

144

कोरजा

कोरजा कोरजा कोरजा कोरजा कोरजा
कोरजा कोरजा कोरजा कोरजा कोरजा

कोरजा कोरजा कोरजा कोरजा कोरजा
कोरजा कोरजा कोरजा कोरजा कोरजा


नरसिंह

सुदेशा शा

कोरज

Donees 14/3/88
President

A. B. S. Sadan (Regd.)
JAMMU.



संख्या

कोरज के लिए यह किताब १४ मार्च १९८८ को
अ. बी. एस. सदान (रजि.) को भेजी गई थी

कोरज के लिए यह किताब १४ मार्च १९८८ को
अ. बी. एस. सदान (रजि.) को भेजी गई थी
नरसिंह

कोरज

लेखक

पैहली बार	:	१९७१
प्रकाशक	:	कमला प्रकाशन, भलवाल, जम्मू
छापने आले	:	एस० एन० मगोत्रा प्रिंटिंग प्रेस ६३-गली खिलोनयां जम्मू तबी ।
मुल्ल	:	चार रुपे पंजाह्, पैसे (४-५०)

आभार

रियास्ती कल्चरल अकादमी दा जिसनै इस पोथी गी छापने
आस्तै किश आर्थिक स्हायता दिती ऐ ।

छापने दा पता :—कमला प्रकाशन भलवाल ते
डोगरी संस्था जम्मू ।

खुद

- नमी कविता-नमे रस्ते
 - धखदे गोद्रे
 - ठारमां रोज
 - शमा जल की धड़की-धड़की
- ते हुन

कोरज

(कविता संग्रह)

उने साथिये दे नां
जेड़े
अधूरी बत्ता गै ले

खा

तरतीब

१	ताशें दा पत्ता	१७
२	सत-रंगी पींग	२०
३	भाव-शुआले	२४
४	निह् लप	२७
५	में टकरान्नां तूफानें नै	२६
६	मदारी	३२
७	होली	३५
८	रोह् ल	३६
९	युगें-शुगें दी खेड ए	४१
१०	में हाल्ली दूर जाना ऐं	४४
११	मानवता	४७

१२	मेरी मनज़ल	५०
१३	सोच	५४
१४	परचोल	५६
१५	छिडे	५८
१६	इक दुआस रात	६१
१७	सौन	६७
१८	अनजानी लीकर	६९
१९	दौड़	७२
२०	समझोता	७५
२१	सरबंध	७८
२२	करम, मान, मरयादा	८१
२३	उत्तर	८५
२४	रचेता	८८
२५	महबूबा	९१
२६	भूठी आसा	९३
२७	भिख-मंगे	९६
२	निशचा	१००
२९	इक सोच कुरस्ती जन्दे दी	१०३
३०	जीवन	१०८
३१	जैहूर तगानै की पियै नें ?	११२
३२	वसूनी	११४
३३	सौदा	११७

३४	ईखी	११९
३५	कसक	१२२
३६	लावा	१२६
३७	दुआसी	१२८
३८	परछामे	१३०
३९	पडां	१३२
४०	गे गुजरे दा	१३५
४१	गीत	१३८
४२	सुआत्म	१३९
४३	घोखा	१४१
४४	इक पुजारी-इक भगवान	१४२



मेरी नजर 'च जीवन ए नई, जम्मना, मरी जाना,
में सई आशा, नराशा नई, में चाह्नां किश करी जाना,
मेरी गैरत नि भुकना जानदी, हिम्मत डरी जाना,
इनें झक्खड़े-तूफाने 'च दी जिसदी लाट नई कम्बै
में अपने लऊए नै ओका अमर दीया जलाना ऐं ।

में हाल्ली दूर जाना ऐं ।

में हाल्ली दूर जाना ऐं ॥

पञ्चान

डोगरी साहित्य दे खेतरे 'च श्री नरसिंहदेव जम्वाल दा औना साढ़े साहित्यक विकास दी इक लाजमी कड़ी दा जुड़ना हा । सन् १९४२ थमां ५२ तक दे दस्ते वरेंह, गी डोगरी साहित्य दा बाल काल आखया ञाई सकदा ऐ । इस अरसे च लखोई दियां कवितां ते दूइयां रचनां, अपने अगें पिच्छे दे माहौल दा चित्रन पेश करदियां न जिंदे अंदर साहित्यक बालपने दी निर्मलता ते बे-बाकी पाई जन्दी ऐ । पर सन् १९५३ थमां १९६२ तक दियां रचनां तरुनाई दे जोश-खरोश कन्ने भरी दियां न । इन्दे अंदर जे प्हाड़ें-नाहुए दे शलैपे, घाटें-पन्यासे दियां मसूरतां, ते मेले-मसादे दियां शौकां मजुद न तां अगें बधने दी तांड ते नमी दुनियां 'च अपने किरदारें दी खोज पड़ताल बी पाई जंदी ऐ । इस चाली १९६२ तक पुजदे-पजांदे डोगरी साहित्य अपनी जुआनी दे दरवाजे तक पुज्जी पे दा हा । ठीक इनें दिनें गै इक सिद्दा सांदा ते चुप-चर्पाता सनाती न्या नौजवान डोगरी संस्था दिये साहित्यक बैठके बिच आई बौहू न लगा ते बल्ले-बल्ले उसने कविता लिखना बी शुरू करी दिता । ए सब इन्ना सहज-सभावक हा जे कुसै गी बी इस नमें कवि दे औने दा बखला-पन नई अक्खरया ।

जम्वाल दा आत्म गौरव पूर्ण शरीफ चेहरा सारें बिच इयां गै धुली-
मिली गया जियां ओ इस्सै भरयां आरतै घड़े-बने दा होऐ । उसदियां
किश गै रचनां सुनियै ए बभोन लगी पया जे डोगरी दी गोदें अंदर
इक नमा बचारक कवि परवरश पा करदा ऐ । उनें दिनें डोगरी च
गजलां लिखने दी घासी नमीं-नमीं गै पवै करदी ही ते जम्वाल दी नपी-
तुली दिये गजलें इनें मैहफलें गी होर बी सजीला बनाई दित्ता ।

श्री नरसिंहदेव जम्वाल दा जन्म डुग्गर दे मशहूर ग्रां भलवाल दे
सपाही पेशा जम्वाल घराने अंदर फरवरी १९३१ च होआ । ए
खानदान डुग्गर दी बीरता ते आत्म गौरव दा परतीक ऐ । अपनी
स्कूली पढ़ाई पूरी करने परैन्त ओ किश चिर मिलटरी सर्विस बिच रे
ते फौ पुलसै दी नौकरी 'च लई लैते गे जित्थे अज ओ सब-इनस्पेक्टर
दे आदे उप्पर कम्म करै करदे न । कंठी दे कठोर ते मैनती बातावणें
उनें गी दृढ़ ते मैनती बनाया । खानदानी वरास्त दै तौर आत्म-गौरव
उन्दै हिस्सै आया । मिलटरी सर्विस नै उन्दै अन्दर अनुशासन दी
भावना भरी ते पुलसै दी नौकरी नै चौकसी ते कर्मशीलता दे गुण
दित्ते । इस चाली डोगरी भाशा गी ए कर्म, ते मर्यादा दी आस्था
आला कवि जूझा ।

में आं मानु ।

जिसदी खातर कर्म, मान मर्यादा उपजे,

कई वारी वरदान वझोंदे

कई वारी में आपूँ सिरजे ।

मेरी नजरें त्रैवै उत्तम, त्रैवै बड्डे

जिन्दी छत्तर-छामां बिच ए

जीवन जोत जलै दी इयां;
 त्रों कींगरें दी गोदा जियां
 भौन बने दा जगदम्बे दा,
 सारी खलकत सीस नुआ'दी ।

कर्म, मान ते मर्यादा दी महमा आले इस कविता-बंद गी अस जम्वाल दियें सारियें रचनाएं दा माप-दण्ड मन्नी सकने आं की जे इन्दी कोई बी रचना समाजक मान मर्यादाए गी नईं त्रोड़दी ते नां गै कुसैं गी त्रोड़ने दी प्रेरणा दिन्दी ऐ । जुआनी दा बाह-वास्ता संसारै दियें परतक्ख सच्चाइयें कन्नै पौंदा ऐ । दुनियां बिच अस गै नईं साढ़े जन्हे होर बी मते सारे लोक रीह्दे न । इहू सफल जीवन बिताने आस्तै असैं गी दूएँ दियें लोड़ें थोड़ें ते भावनाए दा बी आदर-मान करना पौंदा ऐ । बस इत्थें गै साढ़े भाव-संसार अंदर ओ विशालता प्रवेश करदी ऐ जिदै बगैर कोई साहित्य जुआन नईं आख्या जाई सकदा । समाज दियें समूहिक भावनाएं दा बखान गै जुआन कविता दी चेची नशानी ऐ ।

इस समूहिक भावना गी अपनांदे ते अपनी व्यक्तिगत भावनाएं गी समूहिकता अंदर समींदे इक दुख जन उपजदा ऐ । तरुनाई दे दिनें दा हठी मन आपै गी समूहिकता दे समुन्दरै बिच गुआना नईं चाहंदा । इस्से स्थिति दा ब्यान जम्वाल दी इस कविता बिच दिक्खने समझने जोग ऐ

इस दुनियां दी चौकड़ी अंदर
 में आं इक तारा दा पत्ता ।

कोई चुक्की छाती नै लांदा
 कोई बल्लै नई छंड करांदा
 कोई पटकांदा जोरै कन्ने,
 फी में रलियै कुसै सरै नै
 गुमनामी दी चुक्का वौह्नां ।
 उत्थें बैठे दे सई होंदा
 इस खेडै बिच में नई इक्कला—
 इस दुनियां दे सारे मानु
 मेरे साईं ताशै दे पत्ते ।

स्पष्ट ऐ जे “नमी कविता-नमे रस्ते” दिवें कविताएं ते “शमा
 जलै की धड़की-धड़की” दा व्यक्तिवादी कवि अज समाजकता दे नमें
 विसतारें अंदर पैर पा करदा ऐ । आदमी अपने आपै च बड़ा गै
 कमजोर ते नमाना जीव ऐ । ओ इक्कला अपना जीवन तक बी
 बतीत नई करी सकदा पर अपने समूहिक स्तर उप्पर ओ अनत
 शक्ति दा मालक ऐ । जेकर समाजक शक्ति “रूप प्रेमिका” ओदा
 साथ देऐ तां ए तुच्छ व्यक्ति तूफानें कन्ने टक्कर लई सकदा ऐ, प्हाड़ें
 गी मसमार करी सकदा ऐ । इयें भाव जम्वाल दी इस कविता दा
 मूल आधार ऐ ।

छल्लो ! किशती नै टकराओ
 बदलो ! गरजो धरत कम्बाओ
 तुन्दी रोहली वत्त निर्भि जा
 गल्ल करो किश मस्तानें नै ।

तुं मुसकाइयै साथ दे मेरा

में टकरान्नां तूफानें नैं ॥

इस व्यापक दृष्टि दे थोदे गै दुनियां भर दे दुख ते जालोखाले
कवि गी अपने जालोखाले बझोन लगी पाँदे न । कुसै पासै होंदी कोई
बी वे-इनसाफी ते जोर-जवरदस्ती थोदे मनै गी कंडे आला लेखा
चुवदी ऐ । ओ संसारै दे सुखें दुखें गी बानी देने आस्तै मजबूर होई
जन्दा ऐ ते आखरकार ए व्यापक दुख-मुख गै ओदी रोह्ल बनी जंदे
न । अपनी "रोह्ल" नां दी कविता च कवि नैं इन्हें भावनाए गी गै
मूर्त रूप दिता ऐ ।

इकला बी कोई जीन खुआंदा ?

इकला रुख नि जंगल सोभै

मी मनजूर ए जालोखाले

पीड़ां गै सई,

रोह्ल ते ऐ ना

समें दे काह् रा डोला ठप्पो

में नई अपनी धी बरदहानी ।

सचेत होई दी अनंत समाजक शक्ति नैं गै अज मनुक्खे गी ए
समर्था दिती ऐ जे ओ धरती कोला उप्पर उठियै चन्नै शा बी दूर
परें उनें तारें गी तोसने पासै गै बधा' करदा ऐ । अज ओदी गती
वे-अंत ऐ, अज ओदे कोल परानियां ते चुड़ी-पुड़ी दियां गल्लां सोचने
ते सड़े-पड़े दे खत लफाफें फरोलने दी वेह्ल नई ।

में आं नमें युगै दा मानु

चन्न बी जिसदी हाम्बै अंदर

गै तारें गी तोसै करदी
 धरत मेरे तै कोरा कागज
 रोज नमां इक छंद में सिरजां
 जीवन जा दा खिट्टे पे दा ।
 चुड़े-पुड़े दे कागज, अक्खर
 जां भुल्ले दे खत लफाफे
 सिनकै दे ढिङ्ङै चा खुरचां
 इन्नी बेह्ल मिगी ऐ कुत्थें ?

व्यक्तिवादी साहित्य अंदर जगजननी नारी गी छड़ा वासना
 पूर्ती दा साधन मन्नया जन्दां हा । तां गै ओदे अंग-अंग दी सुन्दरता
 दा बखान इस नंगे पन कन्नै कीता गे दा ऐ जे मर्दे गी हवस
 मटाने दे सवा उसदा कोई होर मुल्ल गै नईं होई सकदा । इक समूह-
 चितक साहित्यकार इस हीन भावना कोला उप्पर उठियै नारी गी
 समाज दा अत्यंत उपजोगी ते पवित्र भाग समझदा ऐ । नारी दा
 प्यार कलाकार आस्तै आदर ते मान दी चीज ऐ । अपनी "सौदा"
 नां दी कविता अंदर कवि दी इयै उच्च-भावना व्यक्त होंदी ऐ ।

मेरे हिरखै दी शहजादी,
 मेरे अरमानें दी कलिये !
 तुगी मेरे प रोह् इयै जे मेरे गीतें नजमें च
 तुगी ओ थार नईं थोआ
 जेड़ा मेरे गै कईं साथी तुगी दिन्दे मशायरें 'च ।
 कड़ाकेदार शबदें नै तेरा अंग-अंग तोलै दे
 ते हर इक अक्खरै पर मैहफलै चा —

गूँजदी वाह-वाह । × × × ×

मिगी सिर मत्थै रोहू तेरा

मेरा हिरख इन्ना सस्ता नई ।

सच पुच्छो तां व्यक्ति दे रूपै बिच आदमी इक नाशवान चीज
 ऐ । असैं गी हर बेलै मौती दा भी घेरी रखदा ऐ । जीवन दे हर
 साह गी मौती दे काले परछामें डंगदे रौहू दे न । पर अपने समाजक
 रूपे च मानु अमर ऐ । इक पीढ़ी दै बाद उससै बिच्चा प्रगट होई
 दूई पीढ़ी संसारै दे कम्म-काज सांभी लैदी ऐ । आद-मनुक्खें दियां
 तांड़ां अज्जै दा आदमी पूरियां करै करदा ऐ । इस चाली समूहिक
 रूप बिच मानवता दा प्रवाह अमर ऐ । मौत उदे आस्तै—चुड़े-पुड़ें
 दी सफाई करने आली चाकर-मातर ऐ । अमरता दी ए भावना
 विशाल ते विराट समूह-चेतना दे पूर्ण दर्शन करने दै बाद गै थोदी
 ऐ । इयै भावना ओ दिव्य चक्षु ही जिसनै कर्तव्य थमां डरदे अर्जुन
 गी अमरता दी राह दस्सी ही । जम्वाल दे सचेत कलाकार दी नजरें
 उससै मौती गी इक महबूबा दे रूपै बिच परखया ऐ ।

मेरा उसदा साथ पुराना

चलदा आया युगें युगें शा

ए मिलना फी खिडी जाना । × × ×

जीवन दी मनजल पर जिसलै

दुरी दुरी में थक्की जन्नां—

ओ हिरखै दा हृत्थ बधांदी × × ×

ते में रामै दा मतलाशी

नमी लोए दी ईखी लइयें

उस दी बाह् में बिच सई जन्नां । × × × ×

मौत में समझी ओ 'महबूबा'—

हुट्टी हारी दी आसा गी

जिनै सदा नवजीवन दित्ता ।

कला दी दृष्टि कन्नै जम्वाल दी कविताएं दी परख कुसै पराने
मापदण्ड कन्नै नईं किती जाई सकदी । ओदे छंदें अंदर तुक्के दा
मेल नईं होंदे होई बी ओ छंदें अंदर बज्भी दियां न । दरअसल
कवि नै छंद दा प्रजोग अपने ढंग कन्ने कीते दा ऐ । ए मर्यादा दा
कवि चाहेंदे होई बी छंदें थमां बाहर नईं जाई सकदा । होई सकदा
ऐ जे ओ अपने भावें दे अनुकूल कुतै नमें छंदै दी रचना करै ।
पिच्छै आए दे सारे उदाहरण सोलहें मात्तरें दे सांचे बिच ढले दे न ।
कुतै कुत ओदे उप्पर उद्गं बहुरें दा बी असर ऐ । जित्थें तक
अलंकारें दे प्रयोग दा सम्बंध ऐ ओदियां सारियां कवितां सिद्धियां
सादियां सई होंदियां न । ओदे अलंकार, शब्दें ते अर्थे शा बी परें
भाव-अलंकारें दी ओणी बिच ओदे न । फी बी कुतै कुतै शब्द-
अलंकारें ते अर्थ-अलंकारें दा प्रयोग बड़ा सुन्दर ऐ ।

शब्द अलंकार

चन्न चनैन चनीती चंगी, चित चनान चा चढ़या
कुर मुर मुक्की बिद न्हेरें दी फी आसैं लड़ फड़या

जां

दिल दरबाजे साई झांके दा
दौ नैनें दे कुम्भ सजाई ।

जम्वाल डोगरी दा इक विकास मान - बहुमुखी कलाकार ऐ ।
 ओदी हर नमी रचनां ओदियेँ पहुँलियेँ रचनाएं कोला ज्यादा सुलझी
 दी ते गम्भीर होंदी ऐ । गजलेँ ते कविताएं दे इलावा उस नै मतियां
 सारियां सफल कहानियां, सटेज ते रेडियो दे कामयाव नाटक लिखियेँ
 डोगरी साहित्य गी भरा पूरा बनाया ऐ । कविताएं बिच्च समाजक
 भाव-भूमी डोगरी गी ओदी खास देन ऐ । उसदा इक नावल "सांझी
 घरती-बखले मानु" छपने गी तयार ऐ । विचार प्रधान साहित्यकार
 होने दे कन्ने ओ डुग्गर दा इक प्रसिद्ध चित्रकार बी ऐ । उसदे चित्रों
 दियां कई ममाशां होई चुकियां न । अजें उसनै डोगरी साहित्य गी
 होर बी मतियां सारियां रचनां देनियां न ।

"में हाल्ली दूर जाना ऐँ" कविता दी भावना उसदे लम्मे इरादें
 दा इशारा दिंदी ऐ । अस आशा करने आं जे ओ अपनी इस भावना
 गी सफल बनाई सकै :—

इनेँ झक्खड़ेँ तूफानें 'च बी जिसदी लाट नई' कम्बै
 में अपने लऊऐ नै ओका अमर दीया जलाना ऐँ

जम्मू
 २५. दि० १९७१

दीनू भाई पन्त




ताशै दा पत्ता

इस दुनियां दी चौकड़ी अंदर
में आं इक ताशै दा पत्ता ।

कोई चुक्की अक्खी नै लांदा,
कोई बल्लें नई छंड करांदा,
कोई पटकांदा जोरै नै बी,
फी में रलियै कुसै सरै नै गुमनामी दी धूक्का बौहन्ता ।

उत्थें बैठे दे सई होंदा—
इस खेडै बिच में नई इक्कला,
इस दुनियां दे सारे मानु
मेरे साईं ताशै दे पत्ता ।



बेगम, शाह, यक्के शा लइयें
 दुक्की, तिक्की, चौके. पजे,
 कईं छीके, कईं सत्ते - अट्टे,
 किश नैह् ले
 किश पूरे दैह् ले ।

किश गुल्लें साईं हुकमें बहें
 किश हुकमें साईं हुकम चलांदे
 किश पान्नै साईं बांके सुन्दर,
 किश इट्टे साईं शैल घाटमा,
 कईं चिड़िये साईं बन्न - सबन्ने ।
 कईं गभरू गड़गील सनाह् के,
 कईं गोरी साईं नाजक पतले,
 हर इक दी टैं वक्खरी-वक्खरी
 हर इक दी ऐ अपनी सत्ता,
 मान-सम्मान बी अपना-अपना
 वक्तै पर हर इक दी म्हत्ता
 एका करन थ्रै दुक्कियां तां
 बेगम - शाह - यक्का बी नौदे ।

पल दो पल सब नाटक करदे
 बल्लें - बल्लें भौंदे - ढौंदे,
 इक - दूए कन्नै टकरांदे
 जां रंगै नै रंग मलांदे



जारी बारी सरे नै रलियै
सब उस थारै पर जाई पुजदे;
जित्थे कोई नई निक्का - बड्डा,
जिस थारै पर दुक्की - तिक्की
उस्सै थार न शाह - ते यक्का ।

सब बलगै दे
उस फैटै गी
जिसदे मगरा मौका थोना
अपने करतब फी दस्सने दा ।

चकतै दी बग्गी पर बैठा
इस दुनियां दा चतर खडारी,
खेड युगें शा खेडी जा दा,
जिसलै रंग पवै कोई फिक्का
ताश नमीं फी सिरजी लैदा ॥



सत-रंगी पींग

अम्बरा कुरजी रंगली रींगे,
मन मोहती सतरंगी पींगे !
बरसांती दी लिशकदी धुप्पा,
बदलें दे घुम्मन - वेरे चा,
तुं के सुख - सन्हेआ आइयें
रौस भरी धरती गी दित्ता ?
सुनियें चढ़या रूप सुआया,
कण-कण खुशियें नै मुसकाया ॥



(१)

कन - मन बदलें दी जाई तुं
पौन - फुहारें न्हाती - धोती,
तुई कुस चतुर चतेरै दित्ती,
रंग भरी ए जोवन मस्ती ?

जां तुं कोई अनछेड़ी सरगम
जां मल्हार दी तान नशीली,
जां सौन दा रूप कुआरा
जां वरखा दी मांग सजीली ।

काह् नै दी मुरली दी सपतक
रुकमनियै दा भुंड अध - खुल्ला,
जां रतियै दी सुंदर भरग्रां
कामदेव दा धनख नमुल्ला ।

जां ममता दा प्रीत - पंगूड़ा,
जां भैनु दी हिरख - नशानी,
जां भागू दा शौकी आला
जां गिलमो दी मस्त जुआनी !

गासँ दी आप-मुहारी कूँजे ?
दस तेरै गन चा के आया ?
कै मस्ती बिच जोवन डोह्लें
कै धरती अज पैर टकाया ??

(२)

हिरखी डोरी नै सई होंदा
अज धरती नै अम्बर बजभा,
कुसै कवि दी रचना तै जां
कोई सतरगा रस्ता सज्जा ।

जाँ धोले दे बाल कुसै
सतवती ले रिबन नै सम्हाली,
जाँ अनजाने चा कन्नै कोई
राड़ा गह्री गई कजक कुयारी ।

खिड़दे ज्हारां कमल मनै बिच
तुं जिसलै, जद बी मुसकाई,
तेरे रूपै नै मोह्री लैती
इस कवियै दी चैचलताई ।

दुनियां बिच अनगिनत नजारे
कुस - कुस कन्नें देआं उपमां,
तुं रंगें दी अदभुत सूरत
तुई बोल्लें बिच कियां वन्नां ?

पता नि के जादू के दूना,
कै दिक्खी तुई मन ललचाया
कलम खचोई कै तेरै पासै
दिलै 'च कै ए रूप समाया ? ?

अम्बरा कुरजी रंगली रींगे
मन मोहनी सतरंगी पींगे !
बरसांती दी लिशकदी बुप्पा,
चदलें दे घुम्मन घेरे चा—

तुं के सुख - सन्देश आइयै
रौस भरी भरती गी दित्ता ?
सुनियै चढ़या रूप सुआया ॥
कणा-कणा खुशिये नै मुसकाया !!



भाव-शुआले

कुसै लै दिल करी बौहंदा—
जे इस रौलें दी दुनियां शा,
जलू दोखी शरीकें शा,
जां शिजें ते भमेलें शा,
में होई इक सत - बखला जन;
कुसै सुनसान डंडकारा
कुतै जां प्हाड़ै दी कुक्खा
बनाई लै झोफड़ी अपनी सुखै दा साह् थोऐ जित्थै ।

ब' फी ए सोच आँदी ऐ —

उनें गुमनाम कुक्खें गी,
खड़ोते भूत रुक्खें गी,
बशक्क कोई दुक्ख नई मेरा
ब मेरी पीड़ बी के ऐ ?
मेरे हिरदे दे डारें गी,
इनें धुक्खदे बुआलें गी,
मेरी करुणा, मेरी वेदन
मेरे हिरखै गी बिद समझन,
उनें कुप्पड़ें गी के पई दी,
उनें कंदरें गी लाह् के ऐ ?

सगूं मी समझी निगोसार गुज्जे - गुज्जे ओ हसडन
कलापा दिक्खियै मिक्की मेरी जिन्दू गी ओ कोह् डन —

तां ए सब सोचियै,
ए सोह्ल पित्त डरन लई पौंदा,
ते उस चुप्पी दे शमशानै 'च तन मी परेत जन लगदा,
जियाँ चोफाड़ डडलै 'च कुतै अड़फे दा टुंड सुक्का ।

ते फी इक तांड उठदी ऐ
इनें रौलें 'च गै जीवन,
इनें शिजें 'च गै मनजल ।

ए जालोखाले दुनियां दे
ए पैरै - पैरै पर ठेके गै रहबर तोड़ उमरी दे,
सबल्ली बत्त दस्सै दे ।

मनां ए सार लै बुज्झी,
इनें रौलें 'च जा रुज्झी,
जेड़ी चंगी सै गोदा पा,
कुसै मंदी गी मुंह् नईं ला,
ते इस्सै खेडै दै स्हारै तुं अपनी बत्त तोसी लै;
जियां अनगिनत कनिये 'शा,
कोई टामी कनी खिडदी,
ते मुंह् सिप्पै दै जाई पौंदी,
ते फी जद सामनै आंदी
तां अनविद चमकदा मोती ॥



निहालप

नैन कटोरे करन निहालप दौं नैनें दी तांड
 तोसै तिल - तिल नजर, सरोखड़ लम्मी भरै दलांड ।
 इक ईखी सतरंगी जेड़ी पल - पल रूप सुआरै
 दुई निरासा चंदरी जेड़ी रई-रई चित्त नखारै ।
 भाव - गुआले भयकर भौड़ां, होनी विज्ज ललकारै
 सोच-समुंदर, वेदन किशती, लैहूर हिरख गै तारै ।
 साथ छुड़ी दिन ढलया पच्छम, हुन बलगै किस सहारै
 दुबदा न्हैरी गास पलाम्बै, धरती पैर पसारै ।
 तांड भरोचा दिल धड़कै दा, तांड लग्गी दी लारै
 हुब नमान्ती दो रग रंगी नां जित्ते नां हारै ॥

चन्न चैन चन्तौती चंगी, चित्त चानन चा' चढ़या
 कुर - मुर मुक्की बिद न्हेरें दी, फी आसैं लड़ फड़या ।
 सोझ सत्रल्ली थोई नजरै गी, फी रस्ते पर नस्सै
 सोगगी होई कनसो हर छेड़ा, दिल धड़की किश दस्सै ।
 चीढ़ें ओह्लै उत पगडंडी पर कुसै दे ठनके
 नैन ब्रवके, ओठ बिछी गे, हत्थें गजरे छनके ।
 ब्रट - मट छौरें नजर तलैह्टी छेड़ दुराडी होई
 आस दिलै बिच फी हस्सी गई राह्-रांह्, दु हा कोई ।
 नदिया न्ह्आई परतोई चाननी फिरी दुआसी छाई
 तारें अत्थरूं केरे, धरती - रोई रोई रात ब्याई ॥
 रात समुच्ची पीते अत्थरूं, कलि फिरी मुसकाई,
 लो होने दी आसा सुरकी चिड़ियें चुर - मुर लाई ।
 उत पासैं न्हरे दी चादर लगी गटेई लबबन
 फी सुरकी पे फुल जूड़े दै, बाल खुशी बिच नचचन ।
 थाल सन्हैरी गास पसारै झल-मल झल-मल सज्जा
 आटे भरी परात पद्दरी, औंसी दा राँ बज्जा ।
 लीकर पांदे नग डूछी दा चमक दोरंगी मारै
 दिल धड़कै औंसी गी पांदे, वैह्म दिलै गी चारै ।
 कल हा चंदरा अज भागला ईखी देऐ दलासा
 सूंक बनी जा फिरी निहालप, दिल लगै फी आसा ॥



में टकरान्नां तूफानें नै

जद जीवन दी डोरी बन्नी
फी दुनियां दा गम कै खन्नी ?

तुं मुसकाइयै साथ दे मेरा
में टकरान्नां तूफानें नै ॥

इक इकला दो बारां होन्दे
तां छाले बी फुल बझोंदे
साथें बत्त कटोंदी सौखी
उद्म मिलदे मुसकानें नै

तुं मुसकाइयै साथ दे मेरा
में टकरान्ना तूफानें नै ॥

ए जीवन दे जालो खाले
जरनीकेँ तै बड़े सखाले,
तोल नि मेरे दृढ़ निश्चै गी
में खेडे दां, अरमानें नै

तुं मुसकाइयै साथ दे मेरा
में टकरान्ना तूफानें नै ॥

में लोरेँ दी तरक बी भाखी
में बिजली दी कड़क बी भाखी
ए सब मेरे संगी साथी
सिरजां बसती, वीरानें नै

तुं मुसकाइयै साथ दे मेरा
में टकरान्ना तूफानें नै ॥

में दुरनां तां बत्त बी घड़कै
कडैँ दै दिल कंडा रड़कै,
दोखी, बैरी, सारे समझां
मुंह के लाना दीवानें नै,

तुं मुसकाइयै साथ दे मेरा
में टकरान्ना तूफानें नै ।

जीवन साथ देऐ मुसकाइयै
मौत बी मिलदी गल बांह् पाइयै
जोत जलै तां ए दिल खिड़दा
भाख में लान्नां परवानें नै

तुं मुसकाइयै साथ दे मेरा
में टकरान्नां तूफानें नै ॥

छल्लो ! किशती नै टकराओ
बदलो ! गरजो, धरत कम्बाओ
तुन्दी रोह्ली बत्त निभी जा
गल्ल करो किश मस्तानें नै

तुं मुसकाइयै साथ दे मेरा
में टकरान्ना तूफानें नै ॥



मदारी

दुख सारा गै मजबूरें दा
भुक्खे-नंगें दी लाचारी,
बेपरतीतें, मजलूमें दी निम्मोच्हानी,
आह् नमानी
जद बी सुनची, तां उन्दे शा;
पुत्तर जिन्दे पढ़न वलाइतें ।
मैह्ल - मनारे अम्बर छोंदे,
सुख-दौलत भाए' सज्जै-खब्बे
फी बी अक्खीं आगल कुरजै,
हप्फ-तलप्फी
जतन-सबीलां,
दा-खेडां सब अपने गित्तें ।

वेपरतीते

दुखड़ा दसडन,

इन्नी बेह्ल उनें गी कुत्थे ?

निगोसारे,

झट पलडा दे शरमा - शरमी

उमर निभी जा खट्टन खटदे ।

भाएं मित्तर हा ते भाएं अपना

मान - सम्मान ते हिरख बी मिलया,

फी बी

सुदामा शा नई खुल्ले चौल जेड़े लप गंढी बहे ।

की जे,

लाज - शरम गै खाई गई ।

दुखिये चाह्न बी तां कुन सुनदा ?

कोल नि इन्दै उच्चि कुरसी,

कुसै सटेजा थार नि थोंदा,

इन्दे कम्बदे बोल फड़ी लै

इन्नी हिम्मत माईक च बी नई ।

ते फी निरधन गी कोई पुच्छग—

अज ओका कोई कृष्ण मिलै नई ।

बेपरतीते
 बिपतें उन्दर,
 खड़पैचें दी सारै चौधर :
 निसदिन लाइयै नमे मरक्खे,
 कुल दुनियां दे बनी सजाखे,
 रौला पाइयै,
 मजमा लाइयै
 मजलूमें दा दरद बखानन
 जां समझो तां थां - थां मंडन उन्दी इज्जत, लाज, गरीबी —
 करन जानियै कुशता खज्जल ।
 उन्दे अत्थरूएँ, हौकें गी
 गिने - मिथे दे अक्खरें तोलन
 इस करियै जे
 इस चाल्ली गै लोकें दी हमदरदी थोए,
 करतूतें पर पई जा परदा ।
 इस गल्लै दी मेद नि रत्ती
 समझ इनें गी आई जा एकी;
 दुख चरचा नै दूर नि होंदे
 बंडनै पौदे —
 हत्थ बधाइयै
 छाती डाइइयै ॥



होली

आया होली दा तिहार
चौन्नें पासें ए निखार,
रंगें लाई दी फुहार
सारें रगी दी नुहार,
सैली, नीली, सुई - टंडार
पीली, भगमी, गुलानार,
कुतै तेलिया नसवारी
सव्वै लव्वै दे ललारी,
हत्थें फड़ी पछकारी
रंग दिन्दे न खलारी,

जियां बदली कुआरी
शोख बहाऊ नै नखारी,
होई शरमै नै भारी
लघै तेज छट्टा मारी ।

कम्बै धरती नमानी
डुल्ली-डुल्ली जा जुआनी,
जियां जमना दा पानी
जां फी राधा मन - भानी,
होई काह् नै दी दिवानी
सारी समझियै शतानी,
साम्बै रंगें सिज्जे बाल
पूँजी मुह्.ां दा गुलाल,
कड्डै हिरखी बुआल
ओठ टुक्की देऐ गाल ।

सुनी हस्सी पवै काह् न
अक्खीं भरी मुसकान,
करै सामनै पछकारी
छंदे पांदी ओ बचैरी ।
अंग - अंग बांदै लब्बै
प्यार रोकै, कियां नस्सै ?
टोली गोपिये दी हस्सै
ताल रासै आला बज्जै
रंग डुल्लै खब्बै - सज्जै ।

आखो इंद्र दे मैह्ला
सतरंगे बहल उल्ले
जिनें रंगे घर कुल्ले ।

रंग रार, रंग पार
रंग गलिये बजार
कित्ता धरतिये शंगार ।

रंग खेतरे प जुल्ले
दिवखी जिमीदार फुल्ले,
छंडे चैता आले जुल्ले
भार विपता दे उल्ले ।

बूटा दिनो-दिन सुआया
सिट्टा जोवनै च आया,
रंग सरयां प छाया
फल मेहनतै दा पाया ।

रुत पौंगरे दी आई
डाली देऐ नि लुआई -
फुल्ले सिम्बल, पलाह्
खौर अम्बे नि थमा

खुशी चीन्ने पासै छाई
कोयल देऐ दी बधाई
रंगे पाई दी दुहाई;

दुख रोइयै नि धनोना
 सिक्खो रंगें च रंगोना,
 फल मेहनतै दा थोना
 जो फी होना उऐ होना ।
 रंगें कन्नै सोभै ब्हार
 ब्हार दिलै दा निखार,
 दिल रेशमै दी तार
 चैता इदे तै कटार,
 जेका जीना ऐ दिन चार
 करो जीवनै नै प्यार,
 रंग जीवनै दी सार,
 होली रंगें दा तिहार ।
 लुट्टो मौजां, हस्सो गाओ
 जीन दुखी नि बनाओ,
 होली देऐ ए सन्हेआ;
 दिल करो नि बतेह्।
 उनै पाया जिनै सेह्।
 जेका रह्।, ओ फी रेह्। ॥



रोहल

चुब्बें दा रत्तड़ा सालूं लइयै,
पीड़ें दे डोले पर बइयै,
मेरी सोचें दा इक पुतला —
दुरन लगा तां मी वरदह्, दे
सोच बी आई
सिर चकराया ।

जे रोकां
तां जालो - खाले,
जे टोरां
तां मुन्न - मसान ते इक्कला - पन गै

बिन संगी बिन ताही अड़यो गैं नमानी पुटुंड कियां ?

इक्कला बी कोई जीन खुआंदा ?

इक्कला रुक्ख नि जंगल सोभै,

मी मनजूर ए जालो - खाले—

पीड़ां गौ सई

रोह्ल ते ऐ नां—

समें दे कहारो !

डोला ठप्पो

में नईं अपनी धी बरदहानी !!



युगें-युगें दी खेड ए

झुसमुसे दी बूँ चली,
तां सिर सुआकी इक कलि नै पुच्छया, जे
दस भैनें ! ओं खिड़ां जां नईं खिड़ां ?

दूर चूवको गासै दी
झिलमलांदे, कम्बदे, उस लोई दे तारे गी,
कलि दे इस सुआलै पर,
भलोके पन प', सादगी प'
इक हासा आई गया ।
उनै दिलै 'च सोचया;
जे दिखदी रई ए रात भर गै ज्हारां तारे चमकदे
व' हुन ते सत्र गै छप्पी गे,

ते साह्, गिनै नां

बलगै नां, आँ

सूरजै दी मुसकरांदी, छनछनांदी किरनै गी,
जिदे प्रान्त मौत गै ।

ए जानदे बी चमकया, ते हुनै तक बी चमकै नां,
जे अपनी मरजी होंदी तां,
कौ रात भर आँ चमकदा ?

ब' ए ते अपने हत्थ नई

युगें - युगें दी खेड ए,
इदे'प साढ़ा बस्स नई ।

फी कोल कुसै डालिया,

प्रभात पैछी बोलया,

तां बह्, सुआल भुल्ली गई

ते जिद साम्बी डालिये, बूटें दी उंघ खुल्ली गई ।

करौ - करौ गी छूई गई

अलवेले जीवनै दी गुनगुनांदी, सरसरांदी लैहर ।

कोई मोती दौ त्रेलू दे

कलि दे सोह्ल पिंडे गी नुह्, ली भुजां डिग्गी पे

कुआरा रूप चमकया,

अल्लड़ जुआनी डैह् की पई,

रगै-रगै'च प्यार हा, खुमार हा, निखार हा,

जिदा शुआल साम्बना

उदे बितै 'शा बाहर हा ।

नशीली आकड़ै नैं उसनै अपना आप दिक्खया,
 जुआन रूप डलकया,
 तां ओठ खुल्ले रई गये;
 नशीली अक्खियें 'च नेकां शरम-डोरे पई गये ।
 नाजक कलि निही कुतै,
 जुआन फुल लव्वया,
 जो वेशुमार साथियें नैं अपना सुर मलाई करी
 व्हा रें दे गीत गा दा हा,
 सिरै गी लह्वादा जा दा हा,
 जियां भुलाई अपना आप,
 भजन कीरतन कोई,
 तरकाल संध्या समै,
 थड़े प' मंदरै दै भगती-रस पियै किश लोक गान ।
 मस्ती 'च बाग मैह्कया,
 कण - कण खुशी नैं चैह्कया
 जाने-अंजाने साज हे
 संगीत नमां जम्मया
 पनछानु जिसदे बोल हे—जे;
 खिड़ना साढ़ै हत्थ नई
 कलमाना साढ़ै हत्थ नई
 युगें - युगें दी खेड ए
 इदे प' साढ़ा वस्स नई ॥



में हाल्ली दूर जाना ऐं

समां किश मेह्रवां होए दा ऐ अजकल, तां के होआ,
वशक्क ओ चा नै मुनदे न मेरी हर गल, तां के होआ,
मेरे कछ - कोल सेई होन्दी ऐ इक मनजल, तां के होआ ?

मेरी सोचें दी हद् ए नई,
नां मेरी चाह्त दा वन्ना;
में इक मनजल प' जाई
दूई मनजलै दा मुंढ पाना ऐं ।

में हाल्ली दूर जाना ऐं, में हाल्ली दूर जाना ऐं ॥

(२)

में जाया मुशकलें दा, ठोकरें शा जिव्दगी पा नां,
शरीकें रमज - बाजें च बी ना'रा प्यार दा ला नां,
भरोसा ऐ मी अपने पर तां गैं सोग्गी धरी जा नां,

नां मी गौह् चाननी दा,
न्हैरें दा किश भौ नि ऐ मिक्की,
में आवारा, सलान्ती
बत्ते नैं मेरा यरान्ता ऐं ।

में हाल्ली दूर जाना ऐं, में हाल्ली दूर जाना ऐं ॥

(३)

मेरी नजरें 'च जीवन ए नि ऐ, जम्मना, मरी जाना,
में सई आशा, नराशा नईं, में चाहन्तां किश करी जाना,
मेरी गैरत नि झुकना जानदी, हिम्मत डरी जाना,

इनें झक्खड़ें तुफानें 'च बी
जिसदी लाट नईं कम्बै;
में अपने लऊऐ नैं ओका
अमर दीया जलाना ऐं ।

में हाली दूर जाना ऐं; में हाल्ली दूर जाना ऐं ॥

(४)

में मानु आं आदरश अपना मनुक्खता गै बना करनां,
लोई शा हौसला, रस्ता इनें न्हेरें शा पा करनां,
नमें युग दा में मतवाला, सदा नव - गीत गा करनां,

मी जिस धरती नै, भाषा नै
नमुल्ली बुद्ध ए दिक्ती,
में खीरी बोल्लें तक, साहें, तक
उसदा जस्स गाना ऐं,

में हाल्ली दूर जाना ऐं, में हाल्ली दूर जाना ऐं ॥

(५)

कुसै दोखी नै टकराने दी मी चिन्ता नि चाह् नि ऐ,
मी थौह् ऐ इस समुंदरै दा कोई बन्ना नि थाह् नि ऐ,
रवै कोई उच्चा, औ नीमां, मी इस गल्लै दा लाह् नि ऐ,

ब' ठेकेदारो ! मन मौजी
कुसै दे धीन नई होंदा
उनै हर हालै बिच हस्सना
सदा गै मुसकराना ऐं ।

में हाल्ली दूर जाना ऐं, में हाल्ली दूर जाना ऐं ॥



मानवता

इक भुव साढ़ी, इक समान,
इक न्हे, जुस्से, इक परान,
गोरे, काले, मदरे, उच्चे,
आखर सब होंदे इनसान,

बैर-भाव फी किसी बधाचै ।
मानवता गी कालख लाचै ॥

धरम न सारे उत्तम, उज्जल,
बाझ ज्ञानै सब किश निशफल,
इक मुंढे दियां ए सब शाखां,
रस्ते नेकां पर इक मनजल,

एके गुंजलें कै पलचोना ?
इनें बखेडें किश नि थोना ॥

जैह् र भरोचे दिलें च जिन्ने,
जद वी आपू चें पे छिन्ने,
तद गै कौमां लडियां - मोइयां,
दित्ते सवक्र इतिहासै किन्ने,

बून लडाइयां, नाश गै होआ ।
मानवता मोई किश नि थोआ ॥

जद तक नईं ए गल्लां भुल्ले,
बारां पूरबी, तेरां चुल्ले,
साह् सुखै दा मुशकल थोना,
दिलें दे जेकर बट्ट नि खुल्ले,

रक्खियै बुक्कली चाकू पैने ।
मुह्ं "राम - राम" के मै'ने ??

गल्ल सनैह् री, सोह् नी, सुच्ची,
मानवता सारें शा उच्ची,
साढी अकली पे दे बट्टे,
लैदे पनत ते मुल्लां मुच्ची,

उनें ते लुट्टने दे ढंग सिक्खे ।
सुरग नरक नितां कुस नै दिक्खे ॥

जे मानु अपने गो वुझै,
जन - सेवा विच आपूँ रुझै,
ए भगति सारें शा बड्डी,
की नईं घर परमेसर पुज्जै,

होए मनुक्खता करती हरती ।

सुरग बनी जा इयै घरती ॥



मेरी मनज़ल

बशक्क तुं फुल्लें शा कोमल
बशक्क तुं चन्नै शा उज्जल—
तेरे प्यारै दी दुनियां नै मेरा संसार सज्जे दा,
तेरे ओठें दी मुसकानै नै
बज्झी दी
मेरी घड़कन—मेरा जीवन
ब' तुएँ नई मेरी मनज़ल ।
तेरी हमदरदियें दी गोद साम्बै दी मेरे अत्थरं
सम्हालै दी
मेरे हासे—मेरे ग़म बी ।

में तेरे चेतें दी सुनसान बत्तें पर

ए दीये ईखियें दे

वाले

फी स्हूले कदै आपू ।

सराह्, या तेरे रूपे गी

तां गल्ल कोई ओपरी नई ही—

शलैपें दी सराह्, ना

होंदी आवै दी ऐ सदियें शा ।

मैं

तेरे साथें दो धड़ियां रमानै नै निभी आयां

तां इयां गै;

जियां बत्तें 'प बई जन्दे कदै राह्,

जां

इक दूए दी रोह्, ली बत्त किश सौखी कटोई जन्दी ।

तेरे हिरखं दी

थाह्, पाने तै वी में हाम्बया इक दिन—

हर इक शै पाने तै

ए हाम्ब गै मानु दा जीवन ऐ

उदी

तांडें दी धड़कन ऐ—

जो

डूगे सागरें लेन्दी

पजांदी चन्नै पर उसगी ।

ब'

ए सब दुनियां-दारी ऐ ।

ए परछामें न जीवन दे

कदैं छुट्टे

कदैं लभ्मे

घटी जा दे—बधी जा दे ।

गलाना सच्च मुशकल ऐ

चपासै कौड़तन डुलदी—

ब' फी बी सच्च गै सच्च ऐ,

ते मेरिये

भोलिये जिन्दे !

मेरी सोचें

दिये परिये !

बशक्क तुं फुल्लें शा कोमल,

बशक्क तुं चन्नै शा उज्जल,

बशक्क तुं मेरा जीवन एं

ब'

तुऐ नईं मेरी मनजल ।

में तेरे गीत गा करनां

दिलै बिच

सोचें अन्दर बी शलैपा तां सजा करनां

जे तेरे नैन—

ए दो नैन,

इक बत्तै दे दीये साईं

देऐ करदे न मी उद्दम

सुझा करदे न मी रस्ता

लया करदे न

मी अगगें गै अगगें ओकी मनजल पर—

जिदे पर पुज्जने गित्तै

कलाकारें दे कईं जत्थे

जुगें शा साधना करदे चली जा दे,

मिटी जा दे ॥



सोच

कुदे सुखनें, कुदे चेते मिगी रोज आई सतांदे न,
कदे जखमें गी खुल्लै दे, कदे फी मलम लांदे न ।
ए परछाई कुदी, सतरगे कुसदे रेशमी छौरे,
कदे जो कोल आई बौहंदे कदे दूरा बलांदे न ॥

मी सई होन्दा उदा साथी में सदिये शा खुआ करना,
मी सई होन्दा जे इक्के कहानी रेइ-रेइयै, दुराहा करनां !
ओ किश इयां रची गे दा मेरे साजें, संगीतै च,
मी सई होन्दा में उसदी लै प' जीवन गीत गा करनां ॥

मजर टकरांदे गै उसनै में रंगे 'च रंगोई जन्नां,
 कदें आवारगी कुरजै, कदें स्हान्नें दबोई जन्नां ।
 छड़ी ओ सोच गै जे कर तां फी सरबंध की इन्ना,
 जे उसदे बाल बह्ना छेड़ै, घटा सम्झी पसोई जन्नां ॥

दना साकार होई जा तां, मिटां में अपने भरमें गी,
 मी सेई होन्दा जे उसनै मेरी ऐ पनछान जरमें दी ।
 मिलै नें, खिडै नें, ते फी मुड़ी - मुड़ियै मिलीं जा नें,
 ते' बज्जी हिरखी तंदें 'च नभा ने अपने धरमें गी ॥



परचोल

उऐ मैह्फल
लोक बी उऐ,
रंग बरंगे लाटूँ बी उआं गौ चमकन,
सज्ज-सजावट, सब पैह्लें साईं ।

फी बी बारम्बार ए नजरां
रई-रइयै ओ थार तलोफन,
सुन्न-मसान बभोँदी जित्थें;
की जे अज ओ उत्थें नईं हा—!

ओ—

जिसनै नईं कदै बलाया
रोज जेड़ा बिन सद्दे आया
जिसी जालने खातर मिम्मी रूप ए निसदिन होर सजाया ।

अज मियै नईं, ओ थारा बी

उस भडुए गो झूरै करदा,

जिसनै

इक मस्ताने साईं किश चिर इत्थें धूनी लाई

अलख जगाई

अज पता नईं कुहर बासा ?

दिल दरवाजे साईं भांकै दा

दाँ नैनें दे कुंभ सजाई —

हर कोई मेरी नमोशी थागै

उसदी कोई परचोल नि पांदा,

गल्ल नि लह्दा ।

रत्ती मेद नि परतोने दी,

फी इस गैह्ली हौका मारग

ओ ऐसा बनजारा नईं हा ।

ए दिल फी की हाम्बै करदा ?

की बलगै दा ?

ए हिरखै दी रीत कनई ?

अनजानी ए प्रीत कनई ?

ते जे ए प्रीत दे ओंकर,

तां कैसे बेवकते फुट्टे

जिन्दा फलना-फुलना बज्जा

अत्थरुएं दे पानी कन्ने ॥



छिंडे

छिंडे दिलें 'च जदू' बी होई जन्दे,
अक्ख मिलदे गै रौं पनछोई जन्दे ।

दिल शीशा निं दना बी सट्ट झल्लै,
हर कोई इस गल्लै गी जानदा ऐ ।
लीकर इक दी दूए गी लब्बी जन्दी,
दिल दिलै दी सार पनछानदा ऐ ॥
दिल जदू' बरीकियां प्हीन लगदे,
तंद बजदे गै राग समझोई जन्दे ।

छिंडे दिलें 'च जदू' बी होई जन्दे,
अक्ख मिलदे गै रौं पनछोई जन्दे ॥

मानु लक्ख छपैलै ब' छपदी नईं,
 ओड़क दिलै दी गल्ल जाहूर होई जन्दी ।
 मुशकल अगग डकोंदी जो बली उठ्ठै,
 अंत कदै ना कदै बाहूर होई जन्दी ॥
 ओठ हस्सियै पान भाएं लक्ख परदे,
 ओड़क दिलै दे चोर पकड़ोई जन्दे ।
 छिडे दिलें'च जदू' बी होई जन्दे,
 अक्ख मिलदे बै रौ पनछोई जन्दे ॥

बैह्म दिलै 'च जदू' प्रधान होई जा,
 हासे गुज्जे बी फट्ट गै सई होन्दे ।
 वेदन, हिरख, भाई-चारे सब भुल्ली जन्दे,
 नाते रिशते बी घट्ट गै सई होन्दे ॥
 खरक लगै तां खाल गै खाल पौंदे,
 बाग रोहें 'च अंत बदलोई जन्दे ।
 छिडे दिलें 'च जदू' बी होई जन्दे,
 अक्ख मिलदे गै रौ पनछोई जन्दे ॥

मानु जे 'क पछानी लै अपने गी,
 खुशी सदा तै दिलें 'च होई सकदी ।
 मिट्टी-कौड़ी बी कर्दे जे होई जा तां,
 हसदे-हसदे गै ऐमें ठपोई सकदी ॥
 बोल दुए दे फुल्ल गै सई होन्दे,
 हिरख-तन्दें दिल जदू पलचोई जन्दे ।
 छिडे दिलें 'च जदू बी होई जन्दे,
 अक्ख मिलदे गै रौ पनछोई जन्दे ॥



इक दुआस रात

अति गै डरौनी
ते न्हेरी, घनेरी
ओ लट - बावरी कोई चंडालनी ही
नां नक्कै 'च मुरकी
नां कन्ने 'च वाली
झियाली दी धूड़ै नै जोबन सुआरी
मली ओठें - पोठें 'प लऊऐ दी लाली
धरी रुप रातीं दा छाई गई चवक्खें—
ब्यापी दुआसी ।

ए सुत्ते दा जीवन सदा तै गै सई जा
दिलै बिच ही खुड़कै दी उसदै शरारत
जे
लै निंगली सब ए खुशियां ते हासे
सुरकदे सरीरें 'चा घूसी लै धड़कन ।

ए रौं दिक्खियै कम्बे गासै दे तारे
ते तिल - तिल सरकदा
ओ चन्नै दा डोला—पया पीला मुस्सा ।

ए कण - कण हा चुप
अशकें सैह्मे - डरे दा
जियां
बाज कोई हा चिड़ियें 'प दुक्का,
जां डरदे कुसै कित्ता अक्खीं दा परदा ।
बधी नागनै साईं फी सूंकदी, ओ
मुड़ी गई बलूह्ने साईं घूंकदी ओ
ते लई गई लपेटें 'च इक सोह्ल ओंकर—
तरोड़ी - मरोड़ी ।

घटे गुप्प न्हेरे
तां इयां बझोआ—
बपारी जियां कोई चरस्तै लटोआ ।
जां

भरपूर साथै झा कोई तारा टुट्टा
 बनी, फिर मिसी गासै पर सोह्ल लीकर
 ते गुम - सुम
 खड़ोते दे रई गे दो तुम्मन;
 जो सब किश लुटाइयै बी
 कुसकन, नां बोलन
 मनै दे ए गुवर हुन कुदे नै फरोलन,
 चक्कलें न भांवड़, ते सर-सर धुखै दे—
 जियां काठ गिल्ला ।

ते कछ - कोल
 इक उजड़ी-पुजड़ी भुआखड़
 जिदा संगी-साथी हा
 ओ सोह्ल आँकर ।
 कलेजे दी चुब्बें गी पल - पल दबा दी,
 उदे गीत
 बैनें - बछ्खरें नै गा 'दी
 भरी डंडकारा—नां संगी, नां ताही
 सम्हालियै गोदै 'च फल दौं सराधु
 मनै दी ए कसक
 अम्बरै गी गला 'दी
 कुदै स्हारै कटुड में ए बत्त लम्मी—
 ते कंडें भरोची ?

सुखे दे ओ दो पल
प्रीतै दी झल - मल
जिदै गित्तै बस सुखना ही जां छलावा
ते हुन उमरं भर
रोन पिट्टन ते झूरे—

समें दियां चुब्बां—शरीकें दे न्होरे
ते रीतें - रवाजें दे
वेढंगे पैहरे—

जिनें गी
कदै प्यारै दी सौगगी बईयै
उनें दौं दिलें बी हा महसूस कित्ता ।
ते कोमल दिलें 'चा
ही आवाज निकली;
“इनें गी मटाने तै अस उस्सरे आं—
नमें सुआस लइयै ।”

जिसी तांड हर दम ही
उस बसतियै दी—
जिदे बासियें गी नईं डंगल लचारी ।
जिनै अपने जीवन गी
लड्डन गै मिथया
ब' फी बी नमी पीढ़ियै दी गै सोची,
नमां युग,


नमीं धरती दे सुखने, जिसनै हे
 आपूँ बी दिक्खे ते दुनियां गी दस्से
 ते "जोत" इक जलाइयै
 इन्हें न्हे रें अंदर
 किश इक साथियें नै जिदे पैर हाम्बे—
 नमीं बत्त सोधन ।

ब'
 गै दो दुरे हे जे लै गई त्रुट्टी
 पढ़ोंदे गै मतला' गजल गई मुक्की ।

ओ भाव
 ओ शुआले, ओ सोचां, ओ तांडां,
 दिलै गी त्रुम्बै दियां बनियै चुब्बां—
 केही अक्ख ही
 जिस नै वेदन नि बुझ्झी ?
 केढ़ा दिल हा
 जो अज नईं गमगीन होया—अनरथै 'प रोया ।

ब' जो गीत ओ गाई गया ऐ मनोखे
 भविक्खै दे जां वेदनै दे भरोचे—

सुनी ले न
 धरती नै बी, गासै नै बी ।
 नमी तांड जीवन गी दिक्ती जिन्हें ऐ
 अस ओ मुंगे - मोती सदा साम्बी रखगे ।



ते हुन

जिन्ना मरजी समां जोर लाई लै
बशक्क होनी बी हर गले गी दवाई लै
ब' इतिहासै दी छाती पई ऐ जो लीकर
समें दी रवानी मटाई नि सकदी
कोई होनी उसगी दवाई नि सकदी ।

समां बी ऐ साखी
ए इतिहास साखी
अमर जीवनै दी जो जोती जली जा
उसी मौती नै बी
उजाला गै दिता ।

जिनै गी मिली (जा'न)
दिल - जीभां ओड़क
उनें गीतें गी भुल्ली जाग ए जमाना ?
नामुसकिन,
नामुसकिन ॥



सौन

(१)

ओ मुंह - जोरे बाल कुसै दे,
सई होन्दे सजरे धोते दे,
पौन फनूकें सी बल खंदे,
मस्ती दे बिच होई बतूरे

वे - स्हावे मोती केरै दे ।

(२)

सैल मतूड़ी गोद ए कुसै दी,
सई होन्दी तरेयाई मुजतें दी,
सी तांडें नै मुंह, खोलै दी,
हर डिगदा मोती साम्बै दी

पल-पल रौसैं गी हाम्बै दी ।

(३)

ए मोती अनसम्ब नमुल्ले,
जां फी जहारां बदरे डुल्ले,
गास खजानें दे मुंह खुल्ले,
सत अम्बरा जां तारे उल्ले

दुएँ तै अपने गी मुल्ले ।

(४)

सई हुन्दा खुशियें भगवान,
पा करदा कण - कण बरदान,
कलियें दे ओठें मुसकान,
हर ओंकर हुन छूऐ समान

हर थारै सुरकै दे प्राण ।

(५)

अम्बर छाई घटा घनघोर,
घरती पर नालें दा शोर,
हर थारै पर बोलन मोर,
सतरंगी पीगें दी टौर

हत बरखा दी गै सिरमौर ॥



अनजानी लीकर

कोई गल्ल होन्दी तां दस्सी बी दिन्दा,
कोई गुबर होन्दा तां कड्डी बी दिन्दा,
ब' ए इक जादू
अनजाने 'च आँदा,
दिलै गी जगांदा, शुआले बधांदा,
इक अनजानी लीकर खचोदी दिलै 'चा
ते जाई डुबदी ऐ
तेरी मस्तानी अक्खीं दे हूगे पतालें ।

ब' कोई गल्ल ऐ बी
 जे सुखनें 'च बी जां मेरे जागदे बी
 तुगी सामनै दिक्खियै ओठ कम्बदे,
 फी कम्बदे —
 ते कोई भेत खोले बिना बन्द होंदे
 कदै खुल्ले रौह्दे ।

इनें लीकरे 'च न लक्खां शुआले,
 छपी दी ऐ इन्दे 'च अनसम्ब धड़कन,
 ए अक्खीं दी झम - झम,
 ए ओठें प' छड़कन
 ए अनजान रूहें दी बांकी मसूरत,
 बिना कूए-बोले बी जींदी बझोन्दी ।

ते समझाने आले बड़े ढंग कन्नै
 देऐ दे दलीलां, कलि - भौरे दियां
 जां चन्नै चकोरी जां लैह्, रें ते चन्नै दा सरबंध दस्सी
 लिखी बारता बागें दी, बुलबुलें दी,
 जां मिटदे पतंगें दी, जलदे दीयें दी,
 इनें लीकरें गी न साकार करदे ।

ब' जिन्दे दिलै 'च नि ऐ एकी धड़कन
 उन्दे गितें सब काले-काले न ढल्ले ।

कवि लेखकें दियां ए सब दलीलां न इयां गै,
जियां—

कुसै कंधै पर गाचनी नै कोई फुल्ल-बूट्टे बनाई जा,
जो चिर भर नि रीहं दे

मिसी जन्दे बरखै दी इक फंडै कन्नै ।

जां सुनसान प्हाड़ै दी गुमनाम घासै प

अनजान भुल्ला मसाफर कोई

अपने पैरें नै अनजान सरगम ते छेड़ै

व' वेजान घासै दी धड़कन नि जागै

नां चुप - चाप प्हाड़ै गी गै किश सनोचै ।

दिलै 'चा खचोई ए आकार लीकर,

दिलै दे शुआलें दी अनजान मूरत,

ए समझाने तै जीभ चाई दी दिलै गी,

फी सुनने तै बी कन्न चाई दे दिलै गी ।

ए नेमत दिलै दी पई जिन्दै पल्लै,

इने लीकरें दी ओ बोल्ली पछानन

दिलै दे शुआलें गी अत्त दिल गै जानन ।

उनें सब पता ऐ इनें सारतें दा,

उनें इब्बी भाखा—

जे कियां खचोदी ऐ लीकर दिलै चा

ते जाई डुबदी ऐ कियां मस्तानी अक्खीं दे हूगे पतालें ॥



दौड़

इक दिन मेरा कमरा फंडदे,
इक अलमारी दी धुक्कै चा,
चुड़े - पड़े दे कागज चुकदे
मेरी भागभरी किश उड़की—
फी किश गुड़की,
ते फी मेरे दिखदे - दिखदे
कमरे दे बिच कागज खिल्लरे,
किश हे अखबारें दे परचे—
पैह्ले कालम मुट्टे - मुट्टे
इक दिन सारें गी भांदे हे
अज कुसै दी बी नई सत्ता

अक्खी फाड़ी दिखै दे हे

उस ढलकी दी जुआनी आंगूँ—समां जिसी हा मुल्ली मे दा ।

इयां गै किश खत लफाफे,

मेरे गीतें दे किश मुखड़े

अद् - पचड़े शेअर टोटके,

मुंढ - मजाटे कविताएं दे

भाग - भरे जो तोड़ नि पुज्जे

आलसियें साईं सदा अधूरे ।

दूर परें हा इक लफाफा,

बड़ा टकोदा हस्ती जा दा

इक सनाह् का फुल्ल छपे दा

“फारगैट्ट मी नाट” लिखे दा

अज निहा पर उसदा चेता ।

इक खिनै तै सोच संगोई,

बधी लालसा,

दिल बी कित्ता,

हत्थ बी हाम्बे

पर फी बी किश थौह् नई लगा—

अक्खर इयै कुल्ल बचे दे ।

बाकी सब सितकै नै चट्टे ।

मैं आं नमें युगै दा मानु—
 चन्न बी मेरी हाम्बै अंदर,
 गैं तारें गी तोसै करदी,
 धरत मेरे तै कोरा कागज
 रोज नमां इक छंद में सिरजां
 जीवन जा दा खिट्टे पे दा ।
 भुल्ले - गुत्थें गी फी हाम्बां
 जां फी चुड़े-पड़े दे कागज
 खत-लफाफे
 चेतै-शकलां
 सिनकै दे टिड्डै चा खुरचां
 इन्नी बेह्ल मिगी ऐ कुत्थें ?



समझोता

चलो में मन्नी लैता, तेरे नै पनछान गै नई' ही ।
मेरे ओठें दे भागें 'च दना मुसकान गै नई' ही ॥

ए दिल मेरा गै ना आखर
इसी पतयाना के ओखा ?
ए गम अपना गै स्हेड़े दा,
इसी अपनाना के ओखा ?
समां हर जखमै गी भरदा
सबर हर होनी दा चारा,
इदे स्हुरै ए दिन कटुने
जां मन परचाना के ओखा ?

चलो में मन्नी लैता तेरे नै पनछान गै नई' ही ।

अनेकां राही रस्ते पर मिलै दे
 यार नईं बनदे,
 गरजदे बदल कईं बारी न अम्बर
 रोज नईं कनदे ।
 अस ओ भागें जले दुनखर सई
 दुनियां दे बागै 'च,
 गुआंढी, फी बी सौ छिन्ने
 नां रुह्, मिलदे नां मन मनदे

चलो में मन्नी लैता तेरे नै पनछान गै नईं ही ।

जो हिरखै नईं संजोड़े दा
 उब्बी कोई मान ऐ मोइये ?
 जेड़ा भल्लन गै नईं होऐ
 उब्बी कोई स्हान ऐ मोइये ?
 जो मिलदे गै लटोऐ धन
 उदे शा नईं मिलै, चंगा
 जो दित्ता जा लचारी नै
 उब्बी कोई दान ऐ मोइये ?

चलो में मन्नी लैता तेरे नै पनछान गै नईं ही ।

ए सुनया हा जे मन चंचल ऐ
 इक थारै नि टिकदा ऐ,
 ते जे इक थारै लग्गी जा
 तां फी डरदा नां बिकदा ऐ ।

तेरे नै लाइयै सव झूठा बझोआ,

सच्च इयै हा;

जे राह् पौंदे जां बाह् पौंदे

गै मानु सबक सिखदा ऐ ।

चलो में मन्नी लैता तेरे नै पनछान गै नई ही ।

चलग दिन चार गल्ल साढ़ी

ए चरचा फी मुकी जानी,

छुड़ी ऐठे जेड़ी गैह्ल अस

उदी मुड़ियै की गल्ल ल्हानी ?

तेह्रां कह्नियां किस्से

दना चलदे मुकी जन्दे,

में अपने ओठ सी लैन्ना

नि तु ल्ह्यां फी ए कह्नी ।

चलो में मन्नी लैता तेरे नै पनछान गै नई ही ।

मेरे ओठें दे भागें'च दना मुसकान गै नई ही ॥



सरबंध

घरोंदे सूरजै दी लालगी मी देऐ दी आले,
ए सोचां छोड़, झूठी ईखी दे घेरे तरोंडी दे,
करै ना कैस्सी इक संजां प' तुं कुरबान सब संजां ?
जे जीना ऐ तां मेरी मन्न ! उसी ओ संज मोड़ी दे ।

ते मी ए सोचनै पौंदा, उदी गल्ल मन्नां, नई मन्नां
जिदे पिच्छै तजां बेचैनी, चैन ओ थोग जां नई थोग ?
मी सई होंदा जे उस संजां नै जीवन डोर बज्जी दी,
उसी परतांदे गे ए जिन्दगी बी होग जां नई होग ??

ओ संज जेड़ी दिलै दे इक-इक तारै गो छेड़ी गई,
जियां चुप - चाप भीलै 'च कोई गीटा बगाही मारै,
फी इक घेरे थमां अनगिनत घेरे, बज्जै इक सरगम,
समुच्ची भील गाई उट्टै जिदे संगीत दे स्हारै ।

ओ संज जिसनै समुच्ची झीलै बिच हा डोह्लया सुन्ना,
मेरे मन मंदरै दी चौकियं पर सरस्वति ब्हाली,
मेरा हर बोल कविता - रस भरोचा गीत बनया हा,
मेरे रू - रू 'च जिसनै हिरखै दी इक जोत ही बाली !

ओ संज जिस संजां उसदी रेशमी जुलफें दी छां थोई,
ते ज्हारां चन्न लक्खां तारे इस गोदै 'च आइ पे हे,
सगंधां किन्नियां, किन्ने गै वा'दे साथ रौहने दे
ओ खिन दो खिन नमुल्ले भेत जीने दा सखाई गे हे ।

ओ संज, जियां कुसै स्थलदे दीये दा खीरला लोरा
लो इन्नी जिसदा लशकारा बी अखियें गो सखाया नई
फी गुप्प न्हेरे, मैं जिन्दे बिच सब किश गै गुआई ऐठा
दुआसी दे सिवा किश बी ते मेरे हत्थ आया नई ।

ओ संव अज तक, जिदे मुड़ने दी ईखी 'च
 कड़कदी धुप्प सई होन्दी नां न्हेरे रातीं दे खन्दे,
 आं चुभदा ऐ तां बस चुभदा ऐ मी ए इक्कला - पन गै,
 ते इस चुभै गी न्हेरे संवां दे दूना करी जन्दे ।

जेड़ी उमरी तै जालोखाले निम्मो - च्हानियां दई गई
 बड़ी सिद्दी जनई गल्ल ऐ में ओकी संव भुल्ली जां,
 नमोशी ढलदी संवां दी जदूं दिक्खनां, डरी जन्नां,
 कुतै उस संवां गी भुल्लियै नि अपना आप भुल्ली जां ॥



करम, मान, मरयादा

करम बोलया मूँढे चुक्की :

इस धरती पर में नईं होंदा —

जीवन दी कोई मांग नि होंदी,

किश बनने दी तांड नि होंदी,

धरती होंदी इक वीराना—

जां कोई ऐसा चंडूखाना

हर कोई जित्थें चरसी, फीमी ।

ए सोचां, ए भाव - शुआले,

सिरा सोधना जाई सागर दा,

जां गासें पर दूर डुआरी,

सब किश मानु गी में दिन्ना
बिन मेरै, के लाह, जीने दा ?

गल्ल सुनी तां मान बोलया :—

में आं जीवन दी ओ मनजल

जिस तै मानु

युगें-युगें शा औख जरै दा, करम करै दा ।

में जिसदे मत्थे पर चमकां

उसदे अगें सब नोए दे ।

मान मिले तां

कनी लेतरै दी समझै अपने गी परबत ।

मान मिलै दा तां करियै गै

मुंजी दी सब राखी करदे,

डीला पुट्टी छंड करांदे,

रई बी जा तां छप्पा-गुज्जा

दूए दे टुकड़ें पर पलदा,

इसगी बी कोई जीवन आखग ?

हस्सी पई मरयादा सुनियै ।

रौह, न दयो तुस ए बड़याइयां—

में तुन्दी सोचें शा उप्पर ।

मेरे सुंदर घेरें बिच गै जीवन उस्सरदा-मुसकांदा ।

मी मन्तया भगवान राम नै —
तां सब दुनियां सीस नुआंदी
मरयादा परशोतम आखै ।

धरती पर जे में नईं होंदी
करम - धरम हा कुस नै करना ?
मान कुदा ते कुसदी इज्जत ?
बड़े-बड़े म्हाराजें दी फिर
इक भिखारी
बई चरस्तै बड़े मजे नै पत लुह्दा,
कोई नईं कूँदा ।

इक मीऐं जो हर मानु गी,
हर कौमै गी,
कुदरत दे हर जड़-चेतन गी,
दस्तै नीं करतबब नुआड़ा
जां कुसदी के हद् जां बन्ना ।

जिसलै बी कोई मी नईं मनदा,
जां समझो मरयाद वृद्धै —
काल गड़ाके मारी हाम्बै
प्रलय धारदी रूप भयंकर ।

मैं आं मानु !

जिसदी खातर

करम, मान, मरयादा उपजी ।

कई बारी बरदान बभोंदे,

कई बारी में आपूं सिरजे ।

मेरी नजरें त्रैवै उत्तम

त्रैवै बड्डे

जिन्दी छतर-छामां बिच ए जीवन जांत जलै दी इयां—

जियां

त्रौं किगरें दी गोदा

भौन बने दा जगदम्बे दा

सारी खलकत सीस नुआ दी ॥



उत्तर

सुलकदी विसकलां जन

घासां ए पहाड़ै दी कुक्खै च—

जियां

गुंजले दे चेते न कुसै बेस्हारे मानु दे,

ते जां फी

पलचदे धागे कुसै मजवूर ईखी दे,

गंडोऐ दे

फी दुट्टै दे,

किश इस पासै, किश उस पासै,

कदेँ साकार
 फी ओह्लै
 किश इस धुप्पा, किश उस छामां
 जियां गुपकार बदलेँ 'च मलाका दिन्दी विज्ज लंघै—
 कदेँ इहर
 कदेँ उहर ।

भरी डंडकार में इकला
 बस इकै घोख घोखै दा;
 ए सब किश कल कुत्थेँ हा ?
 इनेँ बत्तेँ 'प में चलदा हा कन्नेँ ब्हार चलदी ही
 नजारे रौस दिन्दे हे ते ओठेँ भाख फवदी ही,
 ए रस्ते —
 अज दिखदे गै जिनेँ गी जिन्द कम्बै दी
 मेरे पैरें दी थापेँ 'च कदेँ झंकार भरदे हे
 मेरी तांडेँ दे पनछानु
 मेरे हिरखेँ दे वाकफ हे,
 भले हे मैहरम ए, जेड़े
 बस इक रातीं 'च बदली गे ?
 ते अज
 होई नाग छलवलिये चक्खेँ दा न हाम्बै दे
 जियां मुजतेँ दे तरयाए
 अनेकां छब्ब ला करदे मेरी रत्तु गी पीने तै ।

मेरी सोचें'च पई खादेल
मनै बिच छोल हा इक्कै—
छुआले उट्टयै वौह् दे
ब' इक्कै गल्ल पुछदे हे;

मनां

ओ कल हा, ए अज ऐ, आखर फरक बी के ऐ ?
मिगी की इयां सई होंदा
जे सारी उमर लंघी गई ?

मेरी सोचें दे घेरे बददे, फी गासै नै जाई छोदे,
ब' निम्मोच्छान परतोदे—
मेरी गल्ला दा कोई उत्तर भला ओ गास की दिन्दा ?
ए व्ह् बी लड़ बचाइयै गई
नजारें नजर फेरी लई ते रुक्खें सिर झुकाई लैते,
हर इक झूड़ी शा सई होंदा
जे ओ कूने शा नावर ऐ ।

तां

उस मुनसान थारै पर
ते उस ददे दै किश थल्ले
खड़ोती डबरिया दे नील-कचन पानिये उप्पर
तेरा छौरा हा हस्सै दा
समुच्चे भेत दस्सै दा ॥



रचेता

जेड़ी वत्ता मिली जा ओ
मिगी ओ वत्त नई थोंदी ।
में उस भड़ुए गी तुप्पै नां
व' मेरी अत्त नई होंदी ॥

ए के किश बोलदे पक्खरू' उसी पनछान सारी ऐ,
ए भौरें, जुगनुएं कन्नै, जिदी सदियें शा यारी ऐ,
ए थां-थां मुसकरांदे फुल्ल उदे ओठें गी स्हाई जदे,
ए नचदे थरकदे पत्तर उदै मन भाई - भाई जंदे

सलान्नी इन्ना ओ जिसदा कदेँ बी पैरा नई थोँदा,
 डुआरी भरत लगदा जद फी तां गासै नै जाई छोँदा,
 कोई गै अम्बरै पर धरदा, कोई पाँदा पताल्लेँ 'च
 बरहेँ री टिल्ल औ लान्नां ब' उसदी थाह् गै नई थोँदी,

में उस भड्डुए गी तुप्पै नां

ब' मेरी भक्त नई होंदी ।

ओ जद च्हाँदा, जिसी च्हाँदा, उदी तसवीर इक खिचदा,
 बड़ी पनछान रंगेँ दी, जिसी लाँदा, उऐ जचदा,
 ए इस दुनियां दे फफड़ताल सारे उसनै वुज्झे न,
 दुखी अत्थरुं, सुखी हासे, कदूँ ओदे 'शा गुज्झे न,
 कदेँ होई सैत बई जन्दा, कदेँ बनदा ज्याना ऐं,
 देऐ सिक्खां, बधा हिम्मत, कदेँ बनदा सयाना ऐं,
 हर इक राह्, दस्सै लोकें गी अनेकां रूप धारै दा,
 जतांह् पासै फिरी जन्दा, उदी चरचा तुआंह् होंदी,

में उस भड्डुए गी तुप्पै नां

ब' मेरी भक्त नई होंदी ।

गलाँदे लोक सारे न जे ओ मीऐं, नि कोई दूआ,
 ब' बिचली रमज औ जान्नां जे में किश नि'ओ कोई दूआ,
 जेड़ा जद बी पलेखे नै मेरे अंदर समाई जंदा,
 मेरी रग-रग फड़कदी ऐ नशा अक्खी 'च छाई जंदा,

फी उस मस्ती 'च अपने आप किश ना किश लिखोंदा ऐ,
ओ रचना देन उसदी ऐ व' नां मेरा गै होंदा ऐ,
ते जिसदी ताड़ा बई रौह्ना, जदूं ओ बिच्च आइ बौह्दा,
उसी अपने 'च बन्नीह् लै मिगी ए होश नई रौह्दी

में जिस भड़ुए गी तुप्पै नां

उदे नै झत्त नई होंदी ॥



महबूबा

मेरा उसदा साथ पराना
चलदा आ'दो युगें-युगें शा ए मिलना, फी खिडी जाना ।
चा' नईं उसदा रूप बखान्तां
चरचा करां गलैपे दी जां—
साथी अपना
कुसी निं लगदा सुन्दर, बांका,
शैल सनाह् का
कैस नै बी नित इऐ गलाया
“रूप मेरी लैला दा अड़यो मेरी दौं अक्खी नै दिक्खो” ।
में बस इन्ना दस्सी सकनां

जीवन दी मनजल पर जिसलै टुरी-टुरी में थक्की जन्ना,
ओ हिरखै दा हत्थ बधांदी
छातो लांदी,
नरम रेशमी औंगलियें नै बाल मेरे फी साहूरे करदी,
मिट्ठी गल्लें नै भरमांदी
अनजाने किश गीत सनांदी ।

ते में

रामै दा मतलाशी
नमी सुब्हा दी ईखी लइयै
उसदी बाह् में बिच सई जन्नां—
जिस चाल्ली कोई प्रेम-पुजारी
अपनी महबूबा नै मिलियै
फी खिडने दा चेता भुल्ली
बेफिकरी दी नींदर सौदा ।

“मौत” ऐ मेरी ओ महबूबा
इक मी गै नई—

हुट्टी हारी हर आसा गी,
हर जीवन गी
जिनै सदा नव जीवन दित्ता ॥



भूठी आसा

बैतल बदल फिरन उत गासा
ए तुद मत्थै बाल बतूरे,
ओ झूरे दे जोवन पाइयै
तुं अघ-खिड़ियै पच्छोता'नी ।
अग्ग दुपासै इक्कै नई, पर,
उद्दर बिजली बनियै कड़कै
तुं अशकें कोई धुखदा गोदु ।

ओ गासै दी गोदा खेडन
 मन मैह्रम परदेसें तेरा,
 ओ, जमदे तां सब नच्चै दे
 मरन तां रौस मिलै धरती गी ।
 तेरा जीवन धुखी - धुखी बी
 चरचा दी चक्की बिच प्होए;
 हासोआनी लोक करै दे ।

रुन - भुन बरन लगी उत बरखा
 इत पासै कुरजे, दो सूट्टे,
 ओ बरियै बंडै दे रौसां
 कण-कण चाहत करै तां उन्दी ।
 ए खारे अत्थरुं वेअरथे
 वे-आसी अक्खीं चा टमके
 भुस्सी खाख बी मुशकल भल्लै ।

पहरै अम्बर मस्त हाथी ओ
 तुं धरती दी कूँज नमानी,
 तेरा उन्दा साथ के मोइये ?
 कै उन्दे पर ईखी ला नी ?
 उन्दी मनजल रस्ता बक्खरा
 तेरे बैन बछूरे समझन
 इन्नी बेह्ल उनें गी कुत्थें ?

कारागार बिच बंद कवि नै
हा बदले गी दूत बनाया,
पर ओ कवि-कल्पना गै ही ।
नई तां ए परतवख यथार्थ,
बदल सन्हेआ नां लई जन्दे,
नां कोई खबर-सुरत लई आँदे
ऐमें जानी मन कलपाँदे ॥



भिख-मंगे

जेठै दी धुप्पा,
भखी दी दपैह्,रीं,
तपी दी लोहे, आंगूँ इक सड़क काली,
छंडै हुआड़ा—
जियां जखमी नागन
रोहै, भरोची, फुनकारे मारै, छड़ा जैह्,र उगलै ।
फी उस तपदी सड़कै 'प
इक रेढ़ियै बिच;
इक फुल्ल हा तिड़कै दा धुप्पै 'च इयां,
जियां तपदी भट्टी 'च कोई दाना पई जा,
फी पौंदे गै तिड़कै ते इक फुल्ल बनी जा ।

नां बोरी दा परदा,
 नां रुखे दा छौरा,
 बस इक मैली चादर ते खिल्लरे दे पैसे,
 जो धुपै 'च चमकै दे, लट-लट करै दे,
 ते हर चलते आले दी नज़री गी खिचै दे अपनी गै पेठा ।

ते थोड़े गै छिड़ै—
 ओ छप्परे दी छामां;
 आं, इक घूड़ बुड्डी,
 जो मजबूर अक्खी 'च खट्टियै सफेदी
 हर इक जाने आले दी अक्खी गी दिक्खै,
 फी हथ्ये गी दिक्खै—ते खीसें गी दिक्खै ।

कोई लघी जा दा,
 कोई सुट्टै पैसा;
 ओ पैसा—
 जिसी दिखदे गै अक्ख बुड्डी.
 लगी पौंदी चमकन,
 लगी पौंदी नचचन ।

ते दूई पेठा ओ फुल्ल—
 रेढ़ी 'च हथ्य पैर ल्हंदा ज्याना
 ए मानु दी सन्तान—

जो पिंडे 'प स्हारै दा धुपै गी, लूऐ गी,
नईं फिकर रत्ती, दना पर नि चिन्ता,
जे कुन कोलें लंघया ?

किसी तरस खादा, कुनै दिता पैसा ?

ए भिक्ख ऐ जां नज़राना, उसनै के भाखा,

ओ इक फक्कड़ै साईं गुदड़ी 'च बैठा,

इनें सारी गल्लें 'शा दूर अपनी दुनियां दे सोह्ने पंगूड़े'च हा
झूटी जा दा,

कड़कदी दुपैह्—

बड़ी बेनियाजी नै अपने अंगूठे गी हा घूसी जा दा ।

ते कन्नै गै लग्गे दा हा बोर्ड बड्डा,

बड़े शैल अक्खरें 'च ए हा लिखे दा ;

जे बच्चे ते होंदे न कौमं दी मानत

करो इन्दी फाजत !

ए अनगिनत सड़कें प वेस्ह्,वे बोर्ड ए

ब रेढ़ें 'च फी बी न अनगिनत बच्चे,

जिदे जनम-दाता—

छड़ा जनम दिन्दे ब' पाली नि सकदे

सम्हाली नि सकदे ।

ते मेहनत मजूरी दे मेवे गी छोड़ी

कुसै अगै हथ अड्डना शैल समझन,
ते दिल मोम करने गितै, डोड्डुएं गी
नमें औकरें गी—
जां धुप्पें च जालन,
जां सीतें 'च ठारन,
ते उन्दी कमाई 'प दिन अपने कड्डन ।

जिनें पी लई घोलियै शरम सारी,
उनें मानुएं कैस्सी दुनियां 'च जीना ?
जो नसलै गी अपनी सुआरी निं सक्कै
नेई कौमै गी हक्क जीने दा के ऐ ??



निश्चा

जद मनजल अपनी लई पछानी,
फी कै रस्तें दे गुंजलें विच
फसे दे रोहना ?

वकत गुआना—

पार कदें कोई पुज्जा इयां ?

ओखी गल्ल ते ए बुझना हा, जे—
में कुन ?

मेरी मनजल कोकी,
ओ कैस्सी दुनियां विच आया ?

दिलै दे उज्जल शीशे उप्पर,
भाव - बुग्रालें दी ए लीकर,
जद दिक्खी लई—

जां लया पछानी, अपने गी,
अपने फरजें गी,
तां उसलै जीवन दी मनजल झिल-मल करदी
चमकन लगदी,
करी सारतां सदन लगदी
इस मानु गी अपनी पेठा ।

जद ए शारे समझी बुज्झी,
उद्दम दे किश औंकर फुट्टे,
जागे निशचे;
जोश भरोचा जिन्दू दे इक-इक अंगै बिच,
मनै दा पैछी फंग सुआकी लगी पया मनजल गी हाम्बन
उसलै पी ए जक्को-तक्के,
सोच दलीलां—
कोकै रस्तै औं गै पुट्टां ?
पता निं मनजल थोग बी जां नई ?
दिलै 'च ए न्हे, वह्म बसाने,
सुखनें दी दुनियां बिच वड्यै महल बनाने,
ते फी ढाने;
मूरखता नई तां होर के ऐ ?

कुसै नै ए गल्ल झूठ नि आखी :—
दौं मछुएं पर जिदियां लत्तां
अद्-मजाटे आखर डुवदा ।

छड़ी दलीलें किश नई बनदा,
ऐमें-जानी वकत गुआना,
गया जो गुजरी हत्थ नि आना ।
निशचा करियै—

हामी भरियै—

रस्ता साम्बो

गेइयां पुट्टो !

तां फी इक दिन उऐ रस्ता,
समे दी धुप्पे-छामें दै विच,
बनियै साथी—अपनी रोहूली
गीत सनांदा—दिल परचांदा,
जाई पजाग तुसें गी ओड़क
गिनी-मिथी दी मनजल उप्पर ॥



इक सोच कुरस्तै जन्दे दी

कान्नी दी शान, अपना मान बी घटा'र नां
के गल्ल ऐ, अज कुरस्तै कैस्सी पैर पा'र नां ?
ए गीत की शतानी अज गुनगुना'र नां
आपू' बिकै नां, मानु दी इज्जत घटा'र नां ।

में जद बी जागया तां संग कौमां जागियां
आलें प मेरे मानुएं उ'घां तयागियां ।
में जोत इक जलाई तां नेकां दीये जले
पैरे दे में नशान दिक्ते काफले चले ।

लो देश भगति दी मेरे करी जगी रवै
 जो बई जा थक्की हारियै ओ फी चली पवै ।
 जीने दा अर्थ दस्सै मेरी पैन्नी लेखनी
 बैरी दा लऊ मेरे गितै, बनै मसाजनी ।
 जाती दी आन, धरतिथै दा मान दस्सियै
 इक-इक दिलै'च जोश ते हिम्मत बधा'र नां ।
 नचूक सुत्ते दे मनुक्खें गी जगा'र नां ॥

में जद सराह्या रूपै गी तां फुल्ल हस्सी पे
 सुंदर नजारे चुलबले नैनै च बस्सी गे ।
 ब्हाऊ नै थाप दित्तो अक्खीं नाह्,पें खोलियां
 नीले सरें 'च सुरकियां लैह्,रां बतूरियां ।
 धारें प धूड़ां पईयां नच्ची रेशमी फुह्,र
 हिरखै नै लाली डोह्,ली आया धरतिया निखार ।
 तारें दी सारतें प वारै जिन्द चाननी
 मस्ती दी सरगमै प गा जुआनी रागनी ।
 प्रीतै गी तांड में देआं ओठें गी गरमियां
 कण-कण च जोवनै दी गै घड़कन जगा'र नां ।
 समे-समे प में समे दे गीत गा'र नां ॥

आदी 'शा मानुएं दी म्हानता गी गाया में
 नेकी-वदी'च रूप समे दा सजाया में ।
 कई' बारी मेरे कन्नै कित्ते फुल्लें बी गिले
 अनगिनत दोखी बी मां एकी बत्तै पर मिले ।
 जुलमै दे काँड़े जैह् र घट्ट हस्सियै पीआं
 थूऐ दा लुब्ब अंग कदें फी बी में जीआं ।
 वन्नाह् समे गी अवखरें 'च खुल्ली नई' सकै
 भुल्लै मी दुनियां, देन मेरी भुल्ली नई' सकै ।
 सब चंगे माड़े, परखी तोली, छांटी - छूंटियै
 सभिता दे नग इतिहास तजोरी सजा 'र नां
 हर रोज नमें सिर नमीं धड़कन जगा 'र नां ॥

धरती 'प हिरख, देश भगती प्यार डोह्लया
 न्हेरी गुफें डकोइयै बी में सच्च बोलया ।
 जीमै गी टांके लग्गे कदें लेखनी खसोई
 पागल कदें खुआया भंडी गैह्लियें च होई ।
 जुलमै दी अग्गी 'च कदें फुकोई ए साधना
 कई' बारी लोकें तक नि पुज्जी मेरी बेदना ।
 जुलमै दी लक्ख न्हेरी भुल्ली, गै नि ए रुकी
 अपने गै अंगें दित्ता धोखा, नजर तां भुकी ।

ए कैसा दौर ऐ कलम बी नलाम होऐ दा
के गल्ल ऐ इस कुरस्तै कैस्सी पैर पा'र नां ॥

जीवन दे रूप साहित्य शीशे बिच तुआरां में
मानु दी म्हानता गी लेखें नै शंगारां में ।
वेदन कुसै दिलै दी रई मेरे शा गुज्झी नई'
केढी ही हाम्ब रीझ तांड जो में बुज्झी नई' ।
में जिसदे गीत गाए जाई गासै नै छोआ
आपू' जिसी लताड़या उदे शा नई' ठोआ ।
में नेकी गी सराह्या मिगी बल मिली गया
पाया वदी च पैर तां आपू' मिटी गया ।
लेखक बनै मिसै दा ऐ इतिहास नई' मिसै
ए समझियै बी रस्तें 'च कंडे बछा 'र नां ।
धोखा देऐ नां लोकें गी आपू' बी खा'र नां ॥

टुट्टे दिलें गी जोड़ै बी तां इयै लेखनी
उमरी दे रिशते तोड़ै दी तां इयै लेखनी ।
अमनै दे गीत, सुर-संगीत इदै अधीन न
मुलखें दी जंग, भुक्ख नंग, इदै अधीन न ।

लिखने दी सोझ लेखनी भागें नै थोंदी ऐ
 कालख थपोई जा फी बड़ी मुशकल घनोंदी ऐ ।
 दौलत ए जिसदै कोल ओ की दुनियां शा डरै
 इस साधना दा तारु कैस्सी भविकयै तरै ।
 स्वार्थ दी भुक्ख, लुब्ब, दुक्ख मिजो मारै दे
 जिस जैह्रै शा लोकें गी औ वचांदा आ'र नां
 अज मस्त मगन आपू उऐ जैह्र खा'र नां ॥

लोकें दी गल्लै गल्लै पर आँगल ठुआ'र नां,
 मीऐं बड़ा, मीऐं बड़ा ए रटदा जा'र नां ।
 भुल्ले न फरज मिक्की तां औ डगमगा'र नां
 कालख ए अपने मुहँ पर आपू की ला'र नां ?



जीवन

ऐ जीवन जे गर्भजून गी
जां मानु गल लड्डन जन गी—
तां मानु कै जियै करदा ?
भार तगानै चुक्की फिरदा,
इस बे-अरथे गी छंडने तै कदू' कुसै गी पुच्छन जाना ।

जीवन इक बरदान नमुल्ला
जां आसैं दा तखत सन्है, रा
हिरखी रतनें नै जड़या जो
झल-मल करदा चमकै करदा ।

तांड, शुआले, उद्म, निशचे
 चार सरोखड़ इसदे पावे,
 मान ते वेदन सोह् नियां बाह् मां,
 गौरव इदी पठेल सुह्ानी,
 आन-शान दा सह्ारा लइयै मरयादा दा छत्तर सोभै —
 उमर मखमली गद्दी,
 जिसपर बइयै मानु राज करै दा,
 पल-पल रौसैं गी हाम्बै दा ।

जीवन नई ऐ देन बेअरथी ।
 ए ते इक बरदान नमुल्ला —
 जां इक जग-मग करदा दीया
 तेल जलै सुआसैं दा जिदे बिच
 ज्ञान जोत दा सह्ारा लइयै
 जो न्है रें बिच चानन करदा ।

किन्ने होन चक्खैं न्है रे
 अंधी, भक्खड़, बदल घनेरे,
 फी बी ए निशचे दा पक्का,
 पैडै पे दा, बददा, घटदा, चलदा जा दा,
 नित नमी मनजल गी तोसै
 इस चाली नै राज करै दा ।

आं, कदे समें दी न्हेर-गबारी
इयां इस दीये पर छांदी,
आई-आई फट्ट करारे लांदी
उस्सर-पस्सर औन नि दिन्दी,
लाट नमानी थर-थर कम्बदी ।

आं कदे समें दे मकड़े लोरे
लप-लप करदे अगें बददे
तां ज्यूड़े गी सेक बझोंदा,
तां हर बत्त बी लबदी आखी,
तां ए जीन सियापा लगदा ।

आं कदे समें दी अनराही चक्की
जीवन दाने गी दरडै दी,
बाह्र पुडें शा जान नि दिन्दी ।
तां सई होंदा अंधकार जन
जां आखी लै गर्भजून कोई
सई होंदी ऐ चौन्नें पासें इक डाल अनसम्ब नरासा ।

पर जीवन दा न्हेरा पासा गै जीवन दा तत्थ नि होंदा ।
जे जीवन बिच आस-निरासा दा ए सुन्दर मेल नि होंदा,
तां धरती पर मानु दा जीवन नई कदे सबूरी होंदा,
तोड़ बरेस अधूरा रौहंदा ।

जीवन ते इक सूखम धड़कन
तांडें रीझें दा ओ जीवन
जो रातीं दे न्हे रें बिच बी बडले दी गै लाली तुपदा ।

ते ए गल्ल अचम्बा बी नई ।
सदिये 'शा इतिहास गुआही—
कई बारी गै ए मानु बिपतें दे घेरे टप्पी आया,
चुम्भे पीड़ें बिच मुसकाया,
नां बिपतें गी लड्डन मिथया,
नां इस भारें शा घबराया,
तां थोड़ऐ मनजल पर मनजल,
तां समझै बिच जीवन आया ॥



जैहूर तगानै की पियै नें ?

उब्बी सच्चे

अम्मी सच्चा

इक चाली अस दोऐ सच्चे—

की जे

साढ़े सोच-मनारें दी नीह्, सुनो सुनाई उप्पर ।

अस रेह्, लोकें पर गै निरभर,

कदें बी आपू' बई इक थारै

इस गल्लै दी बेह्ल नि लग्गी

जां समझो तां ठीक नईं बुज्झी
इक-दूए गी पुच्छी लैचै;
“ए छिडा—जो बधदा जा दा”
इसदे आँकर
कुस दिन फुट्टे ?
कियां फुट्टे ?
कैस्सी फुट्टे ?
जैह्,र तगानै की पियै नें,
इस जह्,रै दा अंत बी ऐ कोई ??



बसूनी

गति जीवन दी इन्नी तेज ऐ अजकल—

जे कई बारी

मी सई होंदा मेरा अंग-अंग हुट्टे दा ।

मेरी हर सोच बी लगदी मिगी किश थक्की दी,
मांदी ।

ते में इक हारे दे योघे साईं

गुमनाम कंद्रे दी तपोशै च चली पीन्नां—

सुखै दे साहें, दी आसा,

ते रिसदे जखमें दी ए पीड़

मी खिचदी ऐ उस पेठा ।

मेरे ओठों दी ए मुसकान किश अपनी बझोंदी ऐ
 तेरी जुलफें दी ठंडी छां 'च
 मी किश राम सई होंदा ।
 तेरी बाह् में 'च मी लगदा, जे में
 उस थार आई पूज्जां—
 टकोरां रिसदे जखमें गी में आपूं दई सकड जित्थें ।

ओ रौला,
 मारो-मारी
 अफरा-तफरी, दौड़ ओ दंगल
 तेरी जुलफें दी ठंडी छायां 'च इयां गुआची गे
 जियां
 गंगा दी चंचलताई सम्हाली ही शिवें इक दिन ।

ब' इस थारै प' आइयै बी
 ए जीवन बत्त नईं मुकदी—
 तेरे ओठों दी मुसकानै
 तेरी अक्खीं दी चमकै नै
 तेरे साहें, दी गरमी नै मेरी सोचें गी गरमाया
 ते मी इयां बझोआ
 जे ए जीवन कारखान्ना ऐं
 जिदे अन्दर
 मशीनें दी सदा गडगज्ज पई रौह् दी ।

व' मुजतें तक चलाने तैं —
फौलादै दे इनें जिन्नें गी
अकसर
लोड़ पौंदी, साफ करने, तेल देने दों
ते भाएं
पल दो पल गै सई
उनें गी रोकनै पौंदा ।

तेरी जुलफें दी ठंडी छां बी इक ऐसी बसूनी ऐं
जो मेरियां मैलियां सोचां
पलै बिच साफ करदी ऐ—
मिगी जीवन नमां दिन्दी,
ते में
फी दौड़ा पई जन्नां जमाने दी गति कन्नै ॥



सौदा

मेरे हिरखै दी शहजादी !

मेरे अरमानें दी कलिये !

तुगी

मेरे 'प रोह् इयै;

जे मेरे

गीतें, नज़में 'च तुगी ओ थार नई' थोआ

जेड़ा —

मेरे गै कई साथी तुगी दिन्दे मुशायरें 'च ।

फड़कदे अकखरें 'च तोलदे

अंग-अंग जो तेरा,

ते इक-इक अक्खरै पर
मैह् फलै 'चा गूँजदी वाह्-वाह् ।

इनै यारें 'च मी लबदी ऐ मूरत
ओके मानु दी—

जिनै ना हिरख भाखा हा

ना कोई

मरयाद ही जिसदी,

जेड़ा मानु दे इतिहासै 'च अज बी दाग सई होंदा ।

भरोचे दे बजारें 'च

तेरे अंगें दी गै चरचा

तेरा गुनगान करदा हा तां इस गल्ला

जे कोई शौकी

तेरी जिन्दु दे बदले 'च

उसी दई जा किश इक सिक्के ।

मेरे हिरखै दी शह्जादी !

मेरे अरमानें दी कलिये !

मिगी सिर-मत्थै रोह् तेरा—

मेरा हिरख इन्ना सस्ता नई !!



ईरवी

ए दिल करदा में इस बत्ता तेरे नै दो गेईं दुरदा
ब' गैं पुट्टियै पता नईं केड़ियें सोचें 'च पई जन्नां,
नां पैर अगड़ा पटोंदा ऐ ते नां पिछड़ा गै पौंदा ऐ,
फसी उद्-ढाड में इक टिक तुगी दिखदा गै रई जन्नां ।
ते तुं परछामे साईं घटदी कदे बधदी ठुरी जा नी,
जियां नदिया दा पानी गेडा गै गेडा बधी जन्दा,
तुगी थम्मने गितै हत्थ हाम्बदे खाली मुड़ी औंदे,
छलावा इक तुगी समझी में हिम्मत हारी बई जन्नां ॥

ते मी इस हालें बिच दिक्खी तेरा चलना स्की जन्दा,
 ते तुं उस पारै दा फी मी लगी पौन्नी करन शारे,
 मेरी हुट्टी दी हिम्मत फी शुआले लैन लई पौंदी,
 तसल्ली दिदी ऐ गैं गैं, भले लगदे तेरे लारे
 ते जियां कोई चमक मारु थलें बिच पानी सई होंदी,
 में पलखोइयै तेरे शारें दी सेधा फी दुरी पौन्ना,
 भली साथन एं तुं, ना साथ दिन्नी, नां छुड़ी जन्नी
 में के आखां तेरे शारें गी, नां लारे ते ना स्हारे ॥

दनां भर ठैहर हां मोइये ! मिगी इन्ना ते दस्सी जा,
 इसी में बैर समझां जां ए तेरी मेहरबानी ऐं,
 ए छप्पो-लोकी कैस्सी रोज तुं मेरे नै खेडै नी,
 तेरा के रिशता मेरे नै मी दस्स हां ए के कह्नी ऐं ।
 साहें दे जुड़ने शा लइयै साहें दे दुट्टने तक तुं,
 कदें मानु गी बेआसा बेस्हारा होन नईं दिता,
 तेरे पिच्छै चलै दा, डिगै दा मानु रिढ़ी जा दा,
 ए के शबित ऐ तेरे 'च केढी ताकत नूरानी ऐं ??

बशक्क तुं भेत खट्टी रख, बशक्क तुं बोल नईं अड़िये,
 में मानु आं ते मानु गी हर इक थौह् लानै गै पौंदा,
 तेरी ए छप्पोलोकी गै मेरे जीने दा स्हूरा ऐ
 तेरे शारें प' गै वददी ते थौह् मनजल दा मी थोन्दा ।
 में आशिक आं, तुं माशूक ऐं दोऐ इक तन्दै बज्जे दे
 ते हर आशिक गी माशूकै दा नखरा भल्लनै पौंदा
 ब एका मान वेदन सब तेरे छिन्डै गै रौह्ने नै
 छलावा जे तुं नईं होंदी तेरा कोई मुल्ल नईं होंदा ॥



कसक

इस धरती दा कण-कण साखी में सब दा गुन गाया,
हर इक दी में वेदन बुझी, हर थारै चित्त लाया,
औं भागें दा जलेया भौरा, कुसै कलि नईं भाया,
नजार फिरै दी मैहरम तुपदी कोई नजरी नईं आया,

लगदे सत-बखले धरत-अम्बर
सुझदा नईं कोई सहारा ।
बत्तें गुंजल, ओह्लै मनजल
औं बैतल आवारा ॥

औं ओ टुंड बागै दी कुक्खा कदें नि जिसनै फलना,
 ओ देहरी डंडकारा जिसपर दीया कदें नई बलना,
 औं ओ गोद रंडेपे दी जिस बिच कोई डूर नि पलना,
 कूज डुआरै शा निखड़ी गै साथ कुसै नई चलना,

औं बूटे दा बूर जो भड़या
 जां टुट्टा कोई तारा ।
 नां मंदर नां सेज गै दिक्खी,
 औं ओ फुल्ल नकारा ॥

औं ओ रात जिसी लो कुत्थें बिद चानन नई थोई,
 लीकर ओ भागें दी जो बिदना शा निही लखोई,
 औं इक कत्थ बिना सिर पैरै, नां सुनची नां खोई,
 राह-राहं, ओबड़ पैडें दा, बत्त नि झल्लै कोई,

बिन अम्बड़ी कुड़ियै दा मन्दा
 चाह्त जिदा नई चारा ।
 औं बिन जुड़या बट्टा गैहली,
 ठेडे बिच गुजारा ॥

सूंक में आं इक मा-मेटर दी, दुक्खें दा परछामां,
 बेल निरी आंडल - कांडल दी कम्म कुतै नईं आमां,
 रत्तड़ा खत बजोगी आँ, नईं कोई जिसदा सरनामां,
 पक्खरू बाझ ठकाने दै जो भौंदा होई-होई फामां,

मजवूरै दी अक्खीं 'शा
 कोई डिग्गेया अत्थरू खारा ।
 जिसनै रौस कदै नईं दिक्खी,
 आँ ओ हिरख लुआरा ॥

लोक अलगरजी समझन पागल सार नि बिन्द पछानन,
 अपने नजार चराइयै लंघदे, यार नि बिन्द कुआलन,
 जिदी छाती दिल नै नईं के पीड़ कुसै दी जानन,
 जो अत्थरू बस पानी समझन, कैस्सी चुनन सम्हालन,

आँ बिन वव्व मु डे दी रीणी
 कुन देना ऐ लारा ।
 बिच मेलै वी गाह्क नि जुड़या
 आँ कैसा बनजारा ॥

में धुप-छां दा भेत पछांता तां सुर लै पर गा नां,
लोक नि सई उद्म ते साथी, औखें बिच मुसका नां,
मी सई ऐ में मनजल पानी तां ए पैर बधा नां,
गाह्क औने कल नफा बी थोना तां अज बाटा खा नां,

ठंगर सई औं इक वेगौरा,
फी बी दिलै बिच स्हारा ।
अज मिट्टी बिच सुन्ना सई औं
कल में औना कारा ॥



लावा

लाज, धरम, मरयादा छोड़ी,
मानवता दे बंध तरोड़ी,
शारें-शारें, हस्सी-हस्सी
जां गल्लें गी चापी-चापी
जद बी कोई कुसै गी मंडै —
तां कोई चरज-चवात निं होंदा ।
की जे

उसदी जीमै उप्पर होंदा ऐ अधिकार उदा मै ।
पर दूआ उस मंडी कल्लै
होई जन्दा किश होर बी सोग्गा
होर सजाखा,

अपने अबगुन साहूरे करदा
भंडी इक अकसीर वझोंदी ।

गुन उसदे किश होर मठोंदे

गुन—

जो उसदी अपनी दौलत—देन प्रभु दी ।

उसदी सोगगी गै रोकी जा

ए शक्ति नई जीमें अंदर ।

ए सब हासे

भंडी-शारे

इक जलनै साईं धुखदे रौहं दे

फूकै दे अपना गै अंतश—

बित जिसलै नई साम्बी सकदा

जीभ ओ लावा उगली छुड़दी ॥



दुआसी

चुब्बो-चुब्बी बी ही

घोल-खाड़े बी हे,

एकी बत्तै प लक्खां

पुआड़े बी हे ।

गल्ल बिगड़ी कदें

गल्ल बनदी बी ही,

गै सम्हलदी बी ही

रोहली चलदी बी ही ।

साथ के हा, किस
हाल 'च ओ छोड़ी मे ?
टोको-टोकी नि रई
लाह्मे-न्होरे बी मे ।

कोदी रीसा ए कान्ती
चलग रात दिन ?
केड़ा टोकग, सुनग कुन
के आखग ए मन ?

आएं चंगे हे ओ
भाएं माड़े हे ओ,
मजनल इक्कै ही
रोहली हे साड़े हे ओ ।

पैरे-पैरे प अज ए
दुआसी कनई ?
बत्त उऐ, अस उऐ
टोर ओ नई रई ॥



परछामे

समें नै ते भागें बी सी जबर कीते
शरीकें बी गै गै प' दागे पलीते,

ब' अस जानी-बुझियै रेह चुप-चबीते
नां ओ बिद कुसके, दोऐ ओठ सीते,

तां इस चमकदे गासै दे थल्लै अज बी
जदू' साढ़े नैन उन्दे नैन नै मिलदे,

असें गी नि सई, होंदी कोई निम्मों'च्छान्नी
दिलै पर नि उब्बी कोई भार बुझदे ॥

ए ठीक ऐ, जे अस हिरखी धागें नि बज्जे
गिला नां उनें गी नां मी कोई शकायत

बड़ा फरक हा साढ़ी सोचें 'च फी बी
दिलें चा नि कुरजी कदे कोई नफरत

तां जद बी कुतै होऐ सैवन मलाटी
बशक्क साढ़े बिच होंदा गईये दा छिडा

ब उस तेज लोऐ 'च उस रस्ते उप्पर,
गलें मिलदे सई होंदे साढ़ दो छौरे ॥

ए सावत नि करदा जे अस फी बी इक आं ?
उनें लोड़ मेरी, मिगी, थोड़ उन्दी

तुस अपनी सम्हालो, छुड़ो चाड़ो-पाड़ी
जद ठीक बुझगे मटाई लैगे छिडे ॥



पड़ां

ए न्हेरे मिगी अज डरा करदे कैस्सी ?

में इन्दा पछानु

ए मी जानदे न,

बिना इन्दै कोई पल मेरी जिन्दगी दा

कहूं बीतया ऐ ?

ए शायद असर उस झलाके दा लबदा

जेड़ा मेरी बत्तै प' सैवन गं आया—

जां दित्ता कुसै नै मी पलखेरने तै,

जे में इस भलाके गी मनजल मिथी लें
बस इत्थें गै बई जां
तजी सारे उद्दम ।

जां ए शायद आलस ऐ वकती सुखें दा
जां उस मावजो दी ऐ बेफिकरी इन्ती
जेड़ा थोऐ करदा मिगी मेह् नतै दा ।

ए किश बी ऐ
पर मेरी मनजल निं ऐ ए ।
भला इब्बी मुमकिन जे चन्नै गी पाइयै
हर इक तांड मानु दी होई जाग पूरी ?
इदे शा फी अगें निं ओ पैर पुट्टग ??

पड़ाँ

मन्नी लैन्ता में इस मावजो गी

पलेखा,

ए आलस, जां बेफिकरी, किश बी
मिगी मेरी बत्तै शा ढाई निं सकदे
अजें मेरी मनजल
बड़ी दूर साथी ।

अजें मेरी बत्तै प कोई चानती नईं
 अजें मेरी तांडें दी मनजल नि लब्बी,
 समें गी बेअरथा में गालां ए चाह् नईं,
 अजें गै नि झक्की
 ए हिम्मत नि थक्की—
 फी किश थौह् नि लगदा;
 ए न्हेरे मिगी अज डरा करदे कैस्सी
 में इन्दा पछानु
 ए मी जानदे न
 बिना इन्दै कोई पल मेरी जिन्दगी दा
 कदू बीतया ऐ ?



गे गुजरे दा

में अधीन

इक अंग-हीन, मसकीन

में आज्ञा दौं टिगड़ें दा—

बैठ चरस्तै

जने खने दे पैरें अगें हत्थ बछान्तां,

बिना रुके गै

रटे-रटाए

भांत-सभांते बोल बोलियै

जतन करै नां

कुसै कालजै करुणा जागै,

कोई मेरी बी बेदन बुझै ।

कोई दान्ती खैरात बी करदा ।

कोई चाहंदा
पर बिन दित्ते गै नजर झुकाइयै
पैर बघाइयै, लंघी जा'दा ।
कोई अपनी गै सोचें डुब्बा
दिनें दपैहूरीं सुखने दिखदा ।
मेरे बोल ते पेठा छोड़ो
दुनियां दा सब घैको-रौला
उस भड्डुए गी बिंद नि सुनचै ।

रंग-बरंगी दुनियां दे ए रंग-बरंगे जीव सनाहूँ के
भांत-सभांते कम्में रुज्जे
टुरदे जा'दे युगें-युगें शा —
जिस चाली
निजमें बिच बज्जे धरती, चन्न, ए तारा मंडल
सब अपनी बत्तै पर पे दे ।
ते में बैठा बिच चरस्तै
बिना रुके गै
रटे-रटाए
भांत - सभांते बोल बोलियै
कोशश करनां—
जने-खने दा पैर रुकी जा
किश ते दई जा ।
की जे

में इक अंग-हीन
मसीकीन
में आज्ञा दौं टिगड़ें दा ।

कई बारी पर ऐसा होंदा—
कोई अलबेला
नां रुकदा,
आवाज नि सुनदा,
नां किश दिन्दा,
फी बी उसदे मुह्ं निकली गाल मिगी झट सुनची जन्दी ।
ते में फटी-फटी दी नज़रें
उस भड़ुए गी चिर भर दिखनां,
मुट-मरजी नै सीस बी दिन्ना,
फिर मुसकान्नां ।

घृणा किसी ऐ उसदी अवखीं ?
गल्ल दनां बी समझ नि औंदी ।
पर इन्ना में समझी सकनां;
में आं भाएं इक अंग-हीन
मसकीन
जां आज्ञा दौं टिगड़ें दा
ओ इस शा बी गे गुजरे दा ॥



गीत

कोई आवै करदा ऐ ब्हारां लुटांदा
मनां की नि रस्ते च अक्खीं बछांदा ।

तेरे चौन्नें पासें स्तारें दी झल-मल
तेरे पैरे-पैरे प सुरकै दी मनजल
तेरे गीत सुनने तै बेचैन दुनियां
चली चल मलंगें साईं गुनगुनांदा ।

कोई आवै करदा ऐ ब्हारां लुटांदा ॥

उदा मिलना गै साध ही जिन्दगी दी

उनै कदर कीती तेरी बंदगी दी

मुरादें दे दिन हुन उमंगें दे पल खिन

किसी झिजकै नां ब्हारां झोली च पांदा ।

कोई आवै करदा ऐ ब्हारां लुटांदा ॥

मिले मस्त नजरें दे हासे कुसे शा

तुगी सार जीने दी थोई भुसमुसे शा

दिलै बिच छपैली लै सब गम दिलै दे

चमक लोई दे साईं सदा भुसकरांदा ।

कोई आवै करदा ऐ ब्हारां लुटांदा ।

मनां की नि रस्ते च अक्खीं बछांदा ॥



सुआत्म

ऊआं ते दोऐ मानु आं हर गल्लै दे पछानु आं
हर रोज भक्त होंदी ऐ नजरें 'च थाह् मिनोंदी ऐ
जीवन तुम्मी बिता'र नां आयू मिम्मी निभा'र नां
ब रस्ते अपने बक्खरे गैं बक्खरी, रौं बक्खरे

तेरे खयाल होर न्है,

मेरा सुआत्म होर गै ।

तू मंगें नइयां शोह् रतां हर ढंगें मिलन दीलतां
में रोज ए बिचारनां जीवन कियां सुआरनां

पैसा ऐ, तेरी जिन्दगी मी कम्म, जां फी बंदगी
तुं अज गै परतक्ख ऐ में कल्लै पर बी अक्ख ऐ

तेरे खयाल होर न्हे,

मेरा सुआत्म होर गै ।

तुं चढ़दे गी गै पूजया में ढौंदे गी बी हाम्बया
तुं जानीं दिल दुखा'र नां में दरद गै बंडां'र नां
तुं यारें दा बी यार नईं कुसे नै सच्चा प्यार नईं
मी सारें दी जरूरत ऐ जीने दी इयै सूरत ऐ

तेरे खयाल होर न्हे,

मेरा सुआत्म होर गै ।

तुं मालकै गी भुल्लया झूठी खुशी प डुल्लया
मी मालकै दा भौ बी ऐ इस जीवनै प गौह, बी ऐ
तुं गल्लें दिन लंधा'र नां बस जून भोगी जा'र नां
में गल्लें दा शकीन नईं में वक्तै दा अधीन नईं
में रतू जोत वाली दी हर गै धरी सम्हाली दी
इज्जत मिगी ऐ लाडली तुं गीरत हत्थें बेची दी
तेरा मेरा के साथ फी मनजल गै साढ़ी बक्खरी
जद तक न जी-हजरियां कियां मिटन फी दूरियां

तेरे खयाल होर न्हे,

मेरा सुआत्म होर गै ॥



धोखा

गलां दे न हर रातै दी होंदी लो ऐ—

व उस लोई गितै;

कदे जरनै पोंदा

कदे लड़नै पोंदा ऐ हर न्हेरे कन्ने ।

मे जरया बी,

लड़या बी,

फिर लो बी होई ।

पर इस लोई दी कलपना नईं ही कित्ती—

जो धुंदली ऐ इक विधवा दी गिद्दी आंगू;

जेड़ी भुसमुसै न्होन जन्दी उदे नै,

जेदे हिट्ट खट्टे दे अनगिनत न्हेरे,

मनें बही बेदन

जां चुब्भां ते झूरे ।

ते वांदै जो मुसकान ऐ;

सै पीली मुस्सी

सुआसै प भारू, नराशें भरोची—

ते अगें न की उऐ अनगिनत न्हेरे ॥



इक पुजारी—इक भगवान

अपने इस मन मंदर दा में आपूँ कदें पुजारी होनां
धूप धुखान्नां,
सीस नुआन्ता,
तन-मन-घन सब अर्पन करनां
जद बी कोई मुसकान भरोची,
हिरख, सनेह, ममता दी देवी
रूप सजाइयै, चुप-बचीती
सोभन लगदी बने-ठने दे सिंहासन पर ।

उस देवी दे दरशन करदे अक्ख नि थकदी
जीभ नि रजदी भेटां गाइयै
भगति रस दिये रिसमें कन्नै
दूनी चमक बधै कलशै दी,
ऐसे खिन पल आपू अपनी जीवन बता सफल बझोदे ।

पर कई बारी ऐसा होदा—

इस धूफै दी खशवूई चा
मैली सोचें दे पाई लावे
लुब्ब ते मोह, हंकार, स्वार्थ
यम-दूतें साईं भांकन लगदे
भूत-खेड जन पान चवक्खे
कलश सनैहूरी ढौंदा लबदा
मन मेरा तां नरक बझोदा—
ते में भगति-भेटां भुल्ली

यम-दूतें दा गुरु खुआन्ना,
तां फी इक पुजारी गै नई
होई जन्ना भगवान मनै दा;
धीन जिदै सब खेड मनै दी ।

इस गौरव दे कन्नै-कन्नै सोचें दी इक रींग बी श्रींदी
बडलै जियां लो होंदे गै
हंस कतारां
खुल्लै अम्बर भरन डुआरी ।

हर पासै संगीत गूँजदा
 शैखें दी घनघोर चक्कखें
 घड़ियालें दी टन-टन सुनचै,
 करी आरती
 सीस नुआइयै याद करांदे सुरग-दुआरे;
 नरकै दा भगवान गै नईं में
 सुरगै दा परमेसर बी में ।
 तां मी अपनी महत्ता लबदी,
 इस जीवन दी सत्ता लबदी,
 ते में सुरग सजाने खातर
 सारे गै यमदूत मनै दे नक्की लैन्ना,
 भूत-खेड सब डक्की लैन्ना,
 तां थोह् लगदा "मानु के ऐ",
 "मानवता के" ?









श्री नरसिंहदेव जम्वाल दा जन्म
 डुंगर दे मशहूर गां भलवाल दे
 सपाही पेशा जम्वाल घराने अंदर
 फरवरी १९३१ च होआ । ए
 खानदान डुंगर दी वीरता ते
 आत्म गौरव दा परतीक ऐ ।
 कंढी दे कठोर ते मेहनती वातावरणें
 उनें गी दृढ़ ते मैनती बनाया ।
 खानदानी वरास्त दै तौर आत्म-
 गौरव उन्दै हिस्सै आया ।
 मिलटरी सर्विस नै उन्दै अन्दर
 अनुशासन दी भावना भरी ते
 पुलसै दी नौकरी नै चौकसी ते
 कर्मशीलता दे गुण दित्ते । इस
 चाली डोगरी भाशा गी ए कर्म, ते
 मर्यादा दी आस्था आला कवि
 जुड़या ।



कमला प्रकाशन, भलवाल, जम्मू